

目 录

壹、教起所因	1	辛一、依菩薩法修自分行	7
貳、解釋經題	2	辛二、依佛法修勝進行	8
參、經文大意	3	辛三、依前自分廣修成德 _四	8
肆、隨文解釋：	3	壬一、攝修方便 _四	8
甲一、序分 _三	3	壬二、因行成德 _三	8
乙一、證信序	3	壬三、重明起修	9
乙二、發起序 _三	3	壬四、因修成德	9
丙一、明佛化主	3	辛四、依前勝進辨修成德 _三	9
丙二、辨其徒眾 _三	3	壬一、辨其所修	9
丁一、聲聞眾	3	壬二、明其所成	9
丁二、菩薩眾 _四	4	戊四、總辨其數	10
戊一、標其眾別	4	丙三、如來現化 _六	10
戊二、列其名字	4	丁一、如來現相起發	10
戊三、讚歎其德 _三	4	丁二、阿難請問 _三	10
己一、歎其權實二德 _三	4	戊一、啟請方便	10
庚一、就自分略歎其德	4	戊二、正宣諸辭 _三	10
庚二、就其勝進廣歎其德 _三	4	己一、申己所見	10
辛一、歎其實德	4	己二、彰己所念	10
辛二、歎其權德 _三	4	己三、結問所為	10
壬一、總歎	4	丁三、如來審問	10
壬二、別顯 _九	5	丁四、阿難實答	11
庚三、雙以結歎	7	丁五、如來讚嘆，敕聽許說 _三	11
己二、歎其自利利他二德 _三	7	戊一、歎其所問	11
庚一、略歎	7	戊二、舉佛功德，敕聽許說 _三	11
庚二、廣歎 _四	7	己一、廣舉佛德 _三	11
		庚一、果勝	11
		庚二、辨因顯果	11
		己二、敕聽許說	11
		丁六、阿難奉敕，彰己樂聞	12

甲二、正宗分 _三	12
乙一、明所行 _三	12
丙一、起行緣.....	12
丙二、依之起行 _三	12
丁一、世間行 _三	12
戊一、聞法發心.....	12
戊二、出家修道.....	13
戊三、詣佛所禮讚發願 _三	13
己一、詣佛所讚歎發願.....	13
己二、出偈辭二.....	13
庚一、讚歎佛德.....	13
庚二、發願求佛 _三	13
辛一、正起願心 _三	13
壬一、求佛法身.....	13
壬二、求佛淨土.....	14
辛二、請佛證知.....	14
丁二、出世行 _三	14
戊一、略 _三	14
己一、法藏請，如來反答.....	14
己二、法藏重請，如來為說.....	14
己三、法藏聞說，依之奉行.....	15
戊二、廣明所行 _三	15
己一、廣前大願 _六	15
庚一、法藏詣佛所彰己行.....	15
庚二、如來遣說.....	15
庚三、法藏自宣己所發願 _七	15
辛一、攝眾生 _三	16
壬一、願生無苦 _三	16
壬二、願生得樂 _三	16
辛二、攝法身.....	17
辛三、重攝眾生.....	17

辛四、重攝法身.....	17
辛五、攝眾生 _四	17
壬一、攝取他國眾生.....	17
壬二、攝取自國眾生.....	17
壬三、還攝他國眾生.....	18
壬四、還攝自國眾生.....	18
辛六、攝淨土.....	18
辛七、重攝眾生 _五	19
壬一、攝取他國眾生.....	19
壬二、攝取自國眾生.....	19
壬三、還攝他國眾生.....	19
壬四、還攝自國眾生.....	20
壬五、復攝他國眾生.....	20
庚四、重復立誓自要 _三	20
辛一、立誓自要 _三	20
壬一、自要.....	20
壬二、順求.....	20
辛二、請證.....	21
庚五、如要相現.....	21
庚六、總以結歎.....	21
己二、廣前所行 _三	21
庚一、明修具 _三	21
辛一、修淨土行.....	21
辛二、修法身行 _三	22
壬一、別 _四	22
壬二、總.....	23
庚二、明報殊勝.....	23
乙二、明其所成 _三	23
丙一、略明所成.....	23
丙二、廣明所成 _四	24

丁一、明佛身	24	庚三、頌前聽法宣布道化	33
丁二、約身明其徒眾	25	己二、頌上初段諸佛同嘆 _三	33
丁三、明國土 _四	25	庚一、頌前十方諸佛共歎	33
戊一、明寶樹	25	庚二、頌前文中釋迦自歎 _三	33
戊二、明伎樂	26	辛一、舉經難聞	33
戊三、明講堂宮殿等	26	辛二、佛智德殊勝，令人歸趣	34
戊四、明寶池	27	辛三、以理教勸	34
丁四、約土明其人民 _四	27	丙三、重攝下人同生彼國 _三	34
戊一、他方新往生者正報微妙	27	丁一、廣舉無量壽國勝妙之事，令人願求 _三	34
戊二、他方新往生者依報殊勝	27	戊一、廣舉無量壽國勝樂之事 _八	34
戊三、舊住者正報微妙	28	己一、彰彼國壽命長遠	34
戊四、舊住者依報殊勝	29	己二、彰彼眾光明殊妙	34
乙三、明其所攝 _四	30	己三、彰彼眾身相具足	34
丙一、攝下人同生彼國 _三	30	己四、彰彼眾智德殊勝	35
丁一、彰生彼住正定聚，令人慕求	30	己五、彰彼生永離惡趣	35
丁二、舉聞名者，皆得往生，增人去心	30	己六、彰彼土興供養多	35
丁三、正辨生業，教修往生 _三	30	己七、彰彼生聞法不絕	35
戊一、總舉	30	己八、彰彼菩薩行德圓備 _三	36
戊二、別顯 _三	31	庚一、別 _七	36
己一、上輩	31	辛一、行修離過	36
己二、中輩	31	辛二、成德圓備	36
己三、下輩	31	辛三、行修具足	36
丙二、攝取上人同往彼國 _三	32	辛四、成德殊勝	37
丁一、略辨	32	辛五、行修增進	37
丁二、廣論 _三	32	辛六、諸力具足	38
戊一、序列	32	辛七、總嘆顯勝	38
戊二、正頌 _三	32	庚二、總結	38
己一、頌上後段菩薩共往 _三	32	戊二、勸人往生	38
庚一、頌前同往	32	丁二、明娑婆界穢惡充滿，使人厭捨 _四	39
庚二、頌前文中恭敬供養	32	戊一、舉三毒煩惱之過 _三	39

己一、明貪過.....	39
己二、明瞋過.....	39
己三、明癡過.....	40
戊二、勸人修捨 _四	40
己一、正勸修捨.....	40
己二、彌勒領解.....	41
己三、重勸修捨 _四	41
庚一、歎前彌勒領荷佛恩.....	41
庚二、慶前彌勒值佛聞法.....	42
庚三、正勸修行.....	42
庚四、勸捨疑惑.....	42
己四、彌勒領行.....	42
戊三、舉五惡五痛五燒苦之過 _三	42
己一、總.....	42
己二、別 _二	43
庚一、問前起後.....	43
庚二、對辨 _五	43
辛一、第一門.....	43
辛二、第二門.....	44
辛三、第三門.....	44
辛四、第四門.....	45
辛五、第五門.....	46
己三、重復總辨.....	46
戊四、勸人修捨.....	47
丁三、就彌陀國辨得彰失，令人修捨 _五	48
戊一、佛勸阿難禮無量壽.....	48
戊二、阿難奉命敬禮彼佛，并願求見.....	48
戊三、由前請，無量壽佛放光普照.....	48
戊四、因佛光照，彼此相見.....	48
戊五、因相見，具彰彼國得失之事，令人修捨.....	49
丙四、重攝上人同生彼國.....	50

甲三、流通分 _四	51
乙一、如來歎經勸學 _五	51
丙一、勸人修行.....	51
丙二、教人請決.....	51
丙三、彰此經法濟益之要.....	51
丙四、舉經難聞生人敬重.....	51
丙五、結勸修學.....	52
乙二、彰說利益，諸人悟道.....	52
乙三、增眾深信.....	52
乙四、大眾同喜.....	52
佛說無量壽經 補充講表.....	1
附表一：釋「教起所因」義.....	1
附表二：無量壽經的翻譯與註解.....	3
附表三：阿羅漢聖者簡介.....	5
附表四：菩薩眾簡介.....	7
附表五：「讚歎菩薩功德」大綱.....	11
附表六：第十七願大綱.....	13
附表七：釋「至心信樂」義.....	14
附表八：《佛說無量壽經》攝修大綱.....	19




《佛說無量壽經》講表

欲述此經，大分為四：

- 壹、教起所因
- 貳、解釋經題
- 參、經文大意
- 肆、隨文解釋

壹、教起所因



——阿彌陀經疏鈔演義——

貳、解釋經題

佛——— 佛者：外國語也，此翻名「覺」。

「覺」有兩義：

一、「覺察」名覺，對煩惱障。煩惱侵害，事等如賊，

唯聖覺知，不為其害，故名為覺。此之一義。如涅槃釋。

二、「覺悟」名覺，對其智障。無明眠寢，事等如睡。聖慧一起，朗然大悟，如睡得悟，故名為覺。

既能自覺，復能覺他，覺行窮滿，故名為佛。言「自覺」者，簡異凡夫；導言「覺他」，別異二乘；「覺行窮滿」，分異菩薩。是故獨此，偏名為佛。

說——— 口音陳唱，目之為說。


無量壽—— 此佛從其壽命彰名。壽有「真」「應」。「真」即常住，性同虛空；「應」壽不定，或長或短。今此所論，是「應」非「真」。於「應」壽中，此佛壽長，凡夫二乘不能測度，知其限算，故曰無量。

命限稱「壽」，云何得知是「應」非「真」？如觀世音及大勢至授記經說：無量壽佛壽雖長遠，亦有終盡。彼佛滅後，觀音、大勢至次第作佛，故知是「應」。

經——— 外國名「脩多羅」，此翻名「縑」。聖人言說，能貫諸法，如縑貫華，故名為「縑」。而言經者，縑能貫華，經能持紬。其用相似，故名為經。

若依俗訓，經者「常」也。人別古今，教儀常楷，故名為「常」。

參、經文大意



肆、隨文解釋：

甲一、序分_二

乙一、證信序

我聞如是。

乙二、發起序_三

丙一、明佛化主

一時，佛住王舍城，耆闍崛山中。

丙二、辨其徒眾_二

丁一、聲聞眾

與大比丘眾，萬二千人俱。一切大聖，神通已達。其名曰：尊者了本際，尊者正願，尊者正語，尊者大號，尊者仁賢，尊者離垢，尊者名聞，尊者善實，尊者具足，尊者牛王，尊者優樓頻樓迦葉，尊者伽耶迦葉，尊者那提迦葉，尊者摩訶迦葉，尊者舍

利弗，尊者大目犍連，尊者劫賓那，尊者大住，尊者大淨志，尊者摩訶周那，尊者滿願子，尊者離障，尊者流灌，尊者堅伏，尊者面王，尊者異乘，尊者仁性，尊者嘉樂，尊者善來，尊者羅云，尊者阿難。皆如斯等上首者也。

丁二、菩薩眾^四

戊一、標其眾別

又與大乘眾菩薩俱。

戊二、列其名字

普賢菩薩，妙德菩薩，慈氏菩薩等，此賢劫中一切菩薩。又賢護等十六正士：善思議菩薩，信慧菩薩，空無菩薩，神通華菩薩，光英菩薩，慧上菩薩，智幢菩薩，寂根菩薩，願慧菩薩，香象菩薩，寶英菩薩，中住菩薩，制行菩薩，解脫菩薩。皆遵普賢大士之德。

戊三、讚歎其德^二

己一、歎其權實二德^三

庚一、就自分略歎其德

具諸菩薩無量行願，安住一切功德之法。遊步十方，行權方便。

庚二、就其勝進廣歎其德^二

辛一、歎其實德

入佛法藏，究竟彼岸。

辛二、歎其權德^二

壬一、總歎

於無量世界，現成等覺。

壬二、別顯^九

癸一、昇兜率天

處兜率天，弘宣正法。

癸二、來下入胎

捨彼天宮，降神母胎。

癸三、出生

從右脇生。現行七步。光明顯曜，普照十方。無量佛土，六種振動。

舉聲自稱，吾當於世，為無上尊。釋梵奉侍，天人歸仰。

癸四、童子相

示現算計、文藝、射御。博綜道術，貫練群籍。

癸五、娉妻相

遊於後園，講武試藝。現處宮中，色味之間。

癸六、出家相

見老病死，悟世非常，棄國財位。入山學道。

服乘白馬，寶冠、瓔珞，遣之令還。捨珍妙衣，而著法服。剃除鬚髮。

端坐樹下，勤苦六年，行如所應。

癸七、成佛道相^五

子一、沐湯形垢

現五濁剎，隨順群生，示有塵垢。沐浴金流，天按樹枝，得攀出池。

子二、行詣道場

靈禽翼從，往詣道場。

子三、受草安坐

吉祥感徵，表章功祚。哀受施草，敷佛樹下，跏趺而坐。

子四、神力降魔

奮大光明，使魔知之。魔率官屬，而來逼試。制以智力，皆令降伏。

子五、現成佛道

得微妙法，成最正覺。

癸八、轉法輪相_二

子一、請

釋梵祈勸，請轉法輪。

子二、說_二

丑一、身口起化

以佛遊步，
佛吼而吼。

扣法鼓，吹法螺，執法劍，建法幢。震法雷，曜法電，澍法雨，演法施。常以法音，覺諸世間。

丑二、身口攝益_四

寅一、身業伏魔

光明普照無量佛土，一切世界六種震動。總攝魔界，動魔宮殿。眾魔懾怖，莫不歸伏。

寅二、口業破邪

摑裂邪網，消滅諸見。散諸塵勞，壞諸欲塹。
嚴護法城，開闡法門。洗濯垢污。
顯明清白，光融佛法，宣流正化。

寅三、身業受供

入國分衛，獲諸豐饍。貯功德，示福田。

寅四、口業說法

欲宣法，現欣笑。

以諸法藥，救療三苦。顯現道意，無量功德。

授菩薩記，成等正覺。

癸九、般涅槃相

示現滅度。

拯濟無極。

消除諸漏，植眾德本。

庚三、雙以結歎

具足功德，微妙難量。

遊諸佛國，普現道教。

己二、歎其自利利他二德_二

庚一、略歎

其所修行，清淨無穢。

譬如幻師，

現眾異像，為男為女，無所不變。

本學明了，在意所為。

此諸菩薩，亦復如是。學一切法，貫綜縷練。所住安諦，靡不感化。無數佛土，皆悉普現。

未曾慢恣，愍傷眾生，如是之法，一切具足。

庚二、廣歎_四

辛一、依菩薩法修自分行

菩薩經典，究暢要妙。名稱普至，道御十方。

辛二、依佛法修勝進行

無量諸佛，咸共護念。佛所住者，皆已得住。大聖所立，而皆已立。

如來道化，各能宣布。

為諸菩薩，而作大師。以甚深禪慧，開導眾人。通諸法性，達眾生相，明了諸國。

辛三、依前自分廣修成德_四

壬一、攝修方便_四

癸一、修自利

供養諸佛，化現其身，猶如電光。善學無畏之網，曉了幻化之法。

癸二、明其利他

壞裂魔網，解諸纏縛。

癸三、復明自利

超越聲聞、緣覺之地，得空、無相、無願三昧。

癸四、重明利他

善立方便。

顯示三乘，於此化終，而現滅度。

壬二、因行成德_二

癸一、自利功德_四

子一、所證平等

亦無所作，亦無所有。不起不滅，得平等法。

子二、所成眾多

具足成就無量總持、百千三昧、諸根智慧。

子三、所證深廣

廣普寂定，深入菩薩法藏。

子四、所成殊勝

得佛華嚴三昧。

癸二、利他德

宣揚演說一切經典。

壬三、重明起修

住深定門。悉觀現在無量諸佛，一念之頃，無不周遍。濟諸劇難，諸閑不閑。

分別顯示真實之際，得諸如來辯才之智。入眾言音，開化一切。

壬四、因修成德

超過世間諸所有法，

心常諦住度世之道。於一切萬物，而隨意自在。

為諸庶類，作不請之友。荷負群生，為之重擔。

辛四、依前勝進辨修成德二

壬一、辨其所修

受持如來甚深法藏，護佛種性常使不絕。

興大悲，愍眾生；演慈辯，授法眼。

杜三趣，開善門；以不請之法，施諸黎庶。

猶如孝子，愛敬父母。於諸眾生，視之若己。

壬二、明其所成

一切善本，皆度彼岸。悉獲諸佛，無量功德。

智慧聖明，不可思議。

戊四、總辨其數

如是之等菩薩大士，不可稱計，一時來會。

丙三、如來現化^六

丁一、如來現相起發

爾時世尊，諸根悅豫，姿色清淨，光顏巍巍。

丁二、阿難請問^三

戊一、啟請方便

尊者阿難，承佛聖旨，即從座起，偏袒右肩，長跪合掌，而白佛言：

戊二、正宣諸辭^三

己一、申己所見

今日世尊，諸根悅豫，姿色清淨，光顏巍巍。如明鏡淨，影暢表裏。威容顯耀，超絕無量。未曾瞻覩殊妙如今。

己二、彰己所念

唯然，大聖！我心念言：

今日世尊，住奇特之法。今日世雄，住諸佛所住。今日世眼，住導師之行。今日世英，住最勝之道。今日天尊，行如來之德。去來現在佛佛相念，得無今佛念諸佛耶？

己三、結問所為

何故威神，光光乃爾？

丁三、如來審問

於是世尊告阿難曰：云何阿難，諸天教汝來問佛耶？自以慧見問威顏乎？

丁四、阿難實答

阿難白佛：無有諸天來教我者，自以所見問斯義耳。

丁五、如來讚嘆，敕聽許說二

戊一、歎其所問

佛言：善哉，阿難！所問甚快！

發深智慧，真妙辯才。愍念眾生，問斯慧義。

如來以無盡大悲，矜哀三界。所以出興於世，光闡道教。欲拯濟群萌，獲以真實之利。無量億劫，難值難見。猶靈瑞華，時時乃出。今所問者，多所饒益。開化一切，諸天人民。

戊二、舉佛功德，敕聽許說二

己一、廣舉佛德二

庚一、果勝

阿難當知，如來正覺，

其智難量，

多所導御，慧見無礙，

無能遏絕。

以一餐之力，能住壽命億百千劫，無數無量，復過於此。

諸根悅豫，不以毀損。

姿色不變。

光顏無異。

庚二、辨因顯果

所以者何？如來定慧，究暢無極。於一切法，而得自在。

己二、敕聽許說

阿難諦聽，今為汝說。

今所問者，多所饒益。開化一切，諸天人民。

丁六、阿難奉敕，彰已樂聞

對曰：唯然，願樂欲聞。

——序分 竟——

甲二、正宗分三

乙一、明所行二

丙一、起行緣

佛告阿難：乃往過去久遠，無量不可思議無央數劫。

錠光如來，興出於世，教化度脫無量眾生，皆令得道，乃取滅度。次有如來名曰光遠，次名月光，次名栴檀香，次名善山王，次名須彌天冠，次名須彌等曜，次名月色，次名正念，次名離垢，次名無著，次名龍天，次名夜光，次名安明頂，次名不動地，次名琉璃妙華，次名琉璃金色，次名金藏，次名炎光，次名炎根，次名地種，次名月像，次名日音，次名解脫華，次名莊嚴光明，次名海覺神通，次名水光，次名大香，次名離塵垢，次名捨厭意，次名寶炎，次名妙頂，次名勇立，次名功德持慧，次名蔽日月光，次名日月琉璃光，次名無上琉璃光，次名最上首，次名菩提華，次名月明，次名日光，次名華色王，次名水月光，次名除癡冥，次名度蓋行，次名淨信，次名善宿，次名威神，次名法慧，次名鸞音，次名師子音，次名龍音，次名處世。

如此諸佛，皆悉已過。

如來、應供、等正覺、明行足、善逝

世間解、無上士、調御丈夫、天人師、佛、世尊。

丙二、依之起行二

丁一、世間行三

戊一、聞法發心

時有國王，聞佛說法，心懷悅豫，尋發無上正真道意。

戊二、出家修道

棄國捐王，行作沙門，號曰「法藏」。高才勇哲，與世超異。

戊三、詣佛所禮讚發願二

己一、詣佛所讚歎發願

詣世自在王如來所，稽首佛足，右遶三匝。長跪合掌，以頌讚曰：

己二、出偈辭二

庚一、讚歎佛德

光顏巍巍
威神無極 如是炎明 無與等者 日月摩尼 珠光炎耀
皆悉隱蔽 猶如聚墨
如來容顏 超世無倫
正覺大音 響流十方
戒聞精進 三昧智慧 威德無侶 殊勝希有
深諦善念 諸佛法海 窮深盡奧 究其涯底
無明欲怒 世尊永無
人雄師子 神德無量 功勳廣大 智慧深妙
光明威相 震動大千

庚二、發願求佛二

辛一、正起願心二

壬一、求佛法身

願我作佛 齊聖法王
過度生死 靡不解脫
布施調意 戒忍精進 如是三昧 智慧為上
吾誓得佛 普行此願
一切恐懼 為作大安
假令有佛 百千億萬 無量大聖 數如恒沙 供養一切
斯等諸佛 不如求道 堅正不卻

壬二、求佛淨土

譬如恒沙 諸佛世界 復不可計 無數刹土
光明悉照 遍此諸國 如是精進 威神難量
令我作佛 國土第一
其眾奇妙
道場超絕
國如泥洹 而無等雙
我當愍哀 度脫一切
十方來生 心悅清淨 已到我國 快樂安隱

辛二、請佛證知

幸佛信明 是我真證
發願於彼 力精所欲
十方世尊 智慧無礙 常令此尊 知我心行
假令身止 諸苦毒中 我行精進 忍終不悔

丁二、出世行_二

戊一、略_三

己一、法藏請，如來反答

佛語阿難：法藏比丘說此頌已，而白佛言：唯然，世尊，我發無上正覺之心。

願佛為我廣宣經法。

我當修行，

攝取佛國，清淨莊嚴無量妙土。

令我於世，速成正覺。

拔諸生死勤苦之本。

佛語阿難：時世自在王佛告法藏比丘：如所修行，莊嚴佛土，汝自當知。

己二、法藏重請，如來為說

比丘白佛：斯義弘深，非我境界。

唯願世尊，廣為敷演諸佛如來，淨土之行。

我聞此已，當如說修行，成滿所願。
爾時世自在王佛，知其高明，志願深廣。
即為法藏比丘而說經言：
譬如大海，一人斗量，經歷劫數，尚可窮底，得其妙寶；
人有至心精進，求道不止。會當剋果，何願不得？
於是世自在王佛，即為廣說二百一十億諸佛刹土，天
人之善惡，國土之粗妙。應其心願，悉現與之。

己三、法藏聞說，依之奉行

時彼比丘，聞佛所說嚴淨國土，皆悉覩見。超發無上殊勝之願。

其心寂靜，志無所著。一切世間，無能及者。具足五劫，思惟攝取莊嚴佛國清淨之行。阿難白佛：彼佛國土壽量幾何？

佛言：其佛壽命，四十二劫。時，法藏比丘，攝取二百一十億諸佛妙土，清淨之行。

戊二、廣明所行_二

己一、廣前大願_六

庚一、法藏詣佛所彰己行

如是修己。

詣彼佛所，稽首禮足，遶佛三匝，合掌而住。白言：世尊，我已攝取莊嚴佛土，清淨之行。

庚二、如來遣說

佛告比丘：汝今可說，

宜知是時。

發起悅可一切大眾，

菩薩聞已，修行此法，緣致滿足無量大願。

庚三、法藏自宣己所發願_七

比丘白佛：唯垂聽察。如我所願，當具說之：

辛一、攝眾生二

壬一、願生無苦二

癸一、願其自國無苦

(一)設我得佛，國有地獄、餓鬼、畜生者，不取正覺。

癸二、願己國中所有眾生命終，不向他國受苦

(二)設我得佛，國中天人壽終之後，復更三惡道者，不取正覺。

壬二、願生得樂二

癸一、願生身樂

(三)設我得佛，國中天人，不悉真金色者，不取正覺。

(四)設我得佛，國中天人，形色不同，有好醜者，不取正覺。

癸二、願生心樂二

子一、五通

(五)設我得佛，國中天人，不識宿命，下至知百千億那由他諸劫事者，不取正覺。

(六)設我得佛，國中天人，不得天眼，下至見百千億那由他諸佛國者，不取正覺。

(七)設我得佛，國中天人，不得天耳，下至聞百千億那由他諸佛所說，不悉受持者。不取正覺。

(八)設我得佛，國中天人，不得見他心智，下至知百千億那由他諸佛國中眾生心念者，不取正覺。

(九)設我得佛，國中天人，不得神足，於一念頃，下至不能超過百千億那由他諸佛國者，不取正覺。

子二、漏盡

(十)設我得佛，國中天人，若起想念貪計身者，不取正覺。

(十一)設我得佛，國中天人，不住定聚，必至滅度者，不取正覺。

辛二、攝法身

(十二) 設我得佛，光明有能限量，下至不照百千億那由他諸佛國者，不取正覺。

(十三) 設我得佛，壽命有能限量，下至百千億那由他劫者，不取正覺。

辛三、重攝眾生

(十四) 設我得佛，國中聲聞有能計量，乃至三千大千世界眾生，悉成緣覺，於百千劫悉共計校，知其數者，不取正覺。

(十五) 設我得佛，國中天人，壽命無能限量。除其本願，脩短自在。若不爾者，不取正覺。

(十六) 設我得佛，國中天人，乃至聞有不善名者，不取正覺。

辛四、重攝法身

(十七) 設我得佛，十方世界無量諸佛，不悉咨嗟稱我名者，不取正覺。

辛五、攝眾生^四

壬一、攝取他國眾生

(十八) 設我得佛，十方眾生，至心信樂，欲生我國，乃至十念。若不生者，不取正覺。唯除五逆，誹謗正法。

(十九) 設我得佛，十方眾生，發菩提心，修諸功德，至心發願，欲生我國。臨壽終時，假令不與大眾圍遶，現其人前者，不取正覺。

(二十) 設我得佛，十方眾生，聞我名號，繫念我國，植眾德本，至心迴向，欲生我國。不果遂者，不取正覺。

壬二、攝取自國眾生

(二十一) 設我得佛，國中天人，不悉成滿三十二大人相者，不取正覺。

壬三、還攝他國眾生

(二二)設我得佛，他方佛土諸菩薩眾，來生我國，究竟必至一生補處。除其本願，自在所化。為眾生故，被弘誓鎧，積累德本，度脫一切。遊諸佛國，修菩薩行，供養十方諸佛如來。開化恒沙無量眾生，使立無上正真之道。超出常倫諸地之行，現前修習普賢之德。若不爾者，不取正覺。

壬四、還攝自國眾生

(二三)設我得佛，國中菩薩，承佛神力，供養諸佛。一食之頃，不能遍至無量無數億那由他諸佛國者，不取正覺。

(二四)設我得佛，國中菩薩，在諸佛前，現其德本。諸所求欲供養之具，若不如意者，不取正覺。

(二五)設我得佛，國中菩薩，不能演說一切智者，不取正覺。

(二六)設我得佛，國中菩薩，不得金剛那羅延身者，不取正覺。

(二七)設我得佛，國中天人，一切萬物，嚴淨光麗，形色殊特。窮微極妙，無能稱量。其諸眾生，乃至逮得天眼，有能明了，辨其名數者，不取正覺。

(二八)設我得佛，國中菩薩，乃至功德者，不能知見其道場樹，無量光色，高四百萬里者，不取正覺。

(二九)設我得佛，國中菩薩，若受讀經法，諷誦持說，而不得辯才智慧者，不取正覺。

(三十)設我得佛，國中菩薩，智慧辯才若可限量者，不取正覺。

辛六、攝淨土

(三一)設我得佛，國土清淨，皆悉照見十方一切無量無數，不可思議諸佛世界。猶如明鏡，覩其面像。若不爾者，不取正覺。

(三二)設我得佛，自地以上，至于虛空。宮殿樓觀，池流華樹，國土所有一切萬物。皆以無量雜寶，百千種香，而共合成。嚴飾奇妙，超諸天人。其香普薰十方世界，菩薩聞者，皆修佛行。若不爾者，不取正覺。

辛七、重攝眾生^五

壬一、攝取他國眾生

（三三）設我得佛，十方無量不可思議諸佛世界眾生之類，蒙我光明觸其體者，身心柔軟，超過天人。若不爾者，不取正覺。

（三四）設我得佛，十方無量不可思議諸佛世界眾生之類，聞我名字，不得菩薩無生法忍，諸深總持者，不取正覺。

（三五）設我得佛，十方無量不可思議諸佛世界，其有女人。聞我名字，歡喜信樂，發菩提心，厭惡女身。壽終之後，復為女像者，不取正覺。

（三六）設我得佛，十方無量不可思議諸佛世界，諸菩薩眾。聞我名字。壽終之後，常修梵行，至成佛道。若不爾者，不取正覺。

（三七）設我得佛，十方無量不可思議諸佛世界，諸天人民。聞我名字，五體投地，稽首作禮，歡喜信樂，修菩薩行。諸天世人，莫不致敬。若不爾者，不取正覺。

壬二、攝取自國眾生

（三八）設我得佛，國中天人，欲得衣服，隨念即至。如佛所讚應法妙服，自然在身。若有裁縫、染治、浣濯者，不取正覺。

（三九）設我得佛，國中天人，所受快樂，不如漏盡比丘者，不取正覺。

（四十）設我得佛，國中菩薩，隨意欲見十方無量嚴淨佛土，應時如願。於寶樹中，皆悉照見。猶如明鏡，覩其面像。若不爾者，不取正覺。

壬三、還攝他國眾生

（四一）設我得佛，他方國土諸菩薩眾，聞我名字。至於得佛，諸根缺陋，不具足者，不取正覺。

（四二）設我得佛，他方國土諸菩薩眾，聞我名字，皆悉逮得清淨解脫三昧。住是三昧，一發意頃，供養無量不可思議諸佛世尊，而不失定意。若不爾者，不取正覺。

（四三）設我得佛，他方國土諸菩薩眾，聞我名字。壽終之後，生尊貴家。若不爾者，不取正覺。

（四四）設我得佛，他方國土諸菩薩眾，聞我名字。歡喜踊躍，

修菩薩行，具足德本。若不爾者，不取正覺。

（四五）設我得佛，他方國土諸菩薩眾，聞我名字，皆悉逮得普等三昧。住是三昧，至于成佛，常見無量不可思議一切如來。若不爾者，不取正覺。

壬四、還攝自國眾生

（四六）設我得佛，國中菩薩，隨其志願，所欲聞法，自然得聞。若不爾者，不取正覺。

壬五、復攝他國眾生

（四七）設我得佛，他方國土諸菩薩眾，聞我名字。不即得至不退轉者，不取正覺。

（四八）設我得佛，他方國土諸菩薩眾，聞我名字。不即得至第一、第二、第三法忍，於諸佛法，不能即得不退轉者，不取正覺。

庚四、重復立誓自要二

辛一、立誓自要二

壬一、自要

佛告阿難，爾時法藏比丘說此願已，以偈頌曰：

我建超世願 必至無上道
斯願不滿足 誓不成等覺
我於無量劫 不為大施主 普濟諸貧苦 誓不成等覺
我至成佛道 名聲超十方 究竟靡所聞 誓不成等覺

壬二、順求

離欲深正念 淨慧修梵行
志求無上道 為諸天人師
神力演大光 普照無際土
消除三垢冥 明濟眾厄難
開彼智慧眼 滅此昏盲暗
閉塞諸惡道 通達善趣門 功祚成滿足
威曜朗十方

日月戢重暉 天光隱不現
為眾開法藏 廣施功德寶 常於大眾中 說法師子吼
供養一切佛 具足眾德本
願慧悉成滿
得為三界雄
如佛無礙智 通達靡不照
願我功德力 等此最勝尊

辛二、請證

斯願若剋果 大千應感動 虛空諸天神 當雨珍妙華

庚五、如要相現

佛語阿難：法藏比丘說此願已，
應時普地六種震動，天雨妙華以散其上，
自然音樂，空中讚言：決定必成，無上正覺。

庚六、總以結歎

於是法藏比丘，具足修滿如是大願，誠諦不虛。超出世間，
深樂寂滅。

己二、廣前所行二

庚一、明修具二

辛一、修淨土行

阿難，法藏比丘於彼佛所，諸天、魔、梵、龍、神八部大眾
之中，發斯弘誓，建此願已。

一向專志莊嚴妙土。

所修佛國，開廓廣大，超勝獨妙，

建立常然，無衰無變。

於不可思議兆載永劫，積植菩薩無量德行。

辛二、修法身行_二

壬一、別_四

癸一、離煩惱

不生欲覺、瞋覺、害覺。
不起欲想、瞋想、害想。
不著色、聲、香、味、觸、法。
忍力成就，不計眾苦。
少欲知足。
無染、恚、癡。
三昧常寂，
智慧無礙。
無有虛偽諂曲之心，
和顏愛語，先意承問。

癸二、修善法

勇猛精進，志願無倦，專求清白之法。
以慧利群生。
恭敬三寶，
奉事師長。
以大莊嚴，
具足眾行。
令諸眾生，功德成就。
住空、無相、無願之法、無作、無起，觀法如化。

癸三、離惡業

遠離麤言，
自害害彼，彼此俱害。
修習善語，
自利利人，彼我兼利。

癸四、重明修善

棄國捐王，絕去財色。

自行六波羅蜜。 教人令行。

壬二、總

無央數劫，積功累德。

庚二、明報殊勝

隨其生處，在意所欲，無量寶藏，自然發應。 教化安立無數眾生，住於無上正真之道。 或為長者居士豪姓尊貴，

或為刹利國君轉輪聖帝，

或為六欲天主乃至梵王。

常以四事，供養恭敬一切諸佛。如是功德，不可稱說。 口氣香潔，如優鉢羅華。

身諸毛孔，出栴檀香。其香普熏無量世界。

容色端正，相好殊妙。 其手常出無盡之寶，衣服、飲食、珍妙華香，繒、蓋、幢、幡、莊嚴之具。

如是等事，超諸天人。 於一切法，而得自在。

乙二、明其所成二

丙一、略明所成

阿難白佛：法藏菩薩為已成佛，而取滅度？為未成佛？為今現在？ 佛告阿難：法藏菩薩今已成佛。現在西方，去此十萬億刹。

其佛世界，名曰「安樂」。 阿難又問：其佛成道已來，為經幾時？

佛言：成佛已來，凡歷十劫。 其佛國土，自然七寶：金、銀、琉璃、珊瑚、琥珀、車磔、瑪瑙合成為地。 恢廓曠蕩，不可限極。 悉相雜廁，轉相間入。光赫煜爍，微妙奇麗，清淨莊嚴。

超踰十方一切世界眾寶中精，其寶猶如第六天寶。

又其國土，無須彌山，及金剛圍，一切諸山；亦無大海、小海、溪、渠、井、谷。佛神力故，欲見則見。 亦無地獄、餓鬼、畜生，諸難之趣。

亦無四時，春秋冬夏。不寒不熱，常和調適。

爾時阿難白佛言：世尊，若彼國土無須彌山，其四天王，及忉利天，依何而住？佛語阿難：第三炎天，乃至色究竟天，皆依何住？

阿難白佛：行業果報不可思議。佛語阿難：行業果報不可思議，諸佛世界亦不可思議。其諸眾生，功德善力，住行業之地，故能爾耳。

阿難白佛：我不疑此法。但為將來眾生，欲除其疑惑，故問斯義。

丙二、廣明所成四

丁一、明佛身

佛告阿難：無量壽佛威神光明，最尊第一。

諸佛光明，所不能及。

或照百佛世界，或千佛世界。取要言之，乃照東方恒沙佛剎。南西北方，四維上下，亦復如是。或有佛光照于七尺；或照一由旬；二三四五由旬。如是轉倍，乃至照一佛剎。

是故無量壽佛，號無量光佛、無邊光佛、無礙光佛、無對光佛、炎王光佛、

清淨光佛、歡喜光佛、智慧光佛、不斷光佛、

難思光佛、無稱光佛、超日月光佛。

其有眾生遇斯光者，三垢消滅。

身意柔軟，歡喜踊躍，善心生焉。

若在三塗極苦之處，見此光明，皆得休息，無復苦惱。壽終之後，皆蒙解脫。

無量壽佛光明顯赫，照曜十方。諸佛國土，莫不聞知。不但我今稱其光明，一切諸佛、聲聞、緣覺、諸菩薩眾，咸共歎譽，亦復如是。

若有眾生聞其光明威神功德，日夜稱說，至心不斷。隨意所願，得生其國。

為諸菩薩、聲聞大眾，所共歎譽，稱其功德。至其最後得佛道時，普為十方諸佛菩薩歎其光明，亦如今也。

佛言：我說無量壽佛光明威神，巍巍殊妙，晝夜一劫，尚不

能盡。

佛語阿難：無量壽佛壽命長久，不可稱計。汝寧知乎？假使十方世界，無量眾生，皆得人身，悉令成就聲聞、緣覺。都共集會，禪思一心。竭其智力，於百千萬劫，悉共推算，計其壽命長遠劫數，不能窮盡，知其限極。

丁二、約身明其徒眾

聲聞、菩薩、天人之眾，壽命長短，亦復如是。非算數譬喻所能知也。又聲聞、菩薩，其數難量，不可稱說。神智洞達，威力自在。能於掌中持一切世界。

佛語阿難：彼佛初會聲聞眾數，不可稱計，菩薩亦然。如大目犍連，百千萬億，無量無數。於阿僧祇那由他劫，乃至滅度，悉共計校，不能究了多少之數。

譬如大海，深廣無量。假使有人析其一毛，以為百分。以一分毛，沾取一涕。於意云何？其所涕者，於彼大海，何所為多？

阿難白佛：彼所涕水，比於大海，多少之量，非巧歷算數，言辭譬類所能知也。佛語阿難：如目連等，於百千萬億那由他劫。計彼初會聲聞菩薩，所知數者，猶如一涕，其所不知如大海水。

丁三、明國土^四

戊一、明寶樹

又其國土，七寶諸樹，周滿世界。金樹、銀樹、琉璃樹、玻璃樹、珊瑚樹、瑪瑙樹、碑磬之樹。或有二寶、三寶，乃至七寶，轉共合成。或有金樹，銀葉華果；或有銀樹，金葉華果；或琉璃樹，玻璃為葉，華果亦然；或水精樹，琉璃為葉，華果亦然；或珊瑚樹，瑪瑙為葉，華果亦然；或瑪瑙樹，琉璃為葉，華果亦然；或碑磬樹，眾寶為葉，華果亦然。或有寶樹，紫金為本，白銀為莖，琉璃為枝，水精為條，珊瑚為葉，瑪瑙為華，碑磬為實；或有寶樹，白銀為本，琉璃為莖，水精為枝，珊瑚為條，瑪瑙為葉，碑磬為華，紫金為實；或有寶樹，琉璃為本，水精為莖，珊瑚為枝，瑪瑙為條，碑磬為葉，紫金為華，白銀為實；或有寶樹，水精為本，珊瑚為莖，瑪瑙為枝，碑磬為條，紫金為葉，白

銀為華，琉璃為實；或有寶樹，珊瑚為本，瑪瑙為莖，硨磲為枝，紫金為條，白銀為葉，琉璃為華，水精為實；或有寶樹，瑪瑙為本，硨磲為莖，紫金為枝，白銀為條，琉璃為葉，水精為華，珊瑚為實；或有寶樹，硨磲為本，紫金為莖，白銀為枝，琉璃為條，水精為葉，珊瑚為華，瑪瑙為實。行行相值，莖莖相望，枝枝相準，葉葉相向，華華相順，實實相當。榮色光曜，不可勝視。清風時發，出五音聲。微妙宮商，自然相和。

又無量壽佛其道場樹，高四百萬里，其本周圍五千由旬，枝葉四布二十萬里。

一切眾寶，自然合成。以月光摩尼持海輪寶，眾寶之王，而莊嚴之。周匝條間，垂寶瓔珞。百千萬色，種種異變，無量光炎，照曜無極。珍妙寶網，羅覆其上，一切莊嚴，隨應而現。

微風徐動，出妙法音，普流十方一切佛國。其聞音者，得深法忍，住不退轉。至成佛道，不遭苦患。目覩其色，耳聞其音，鼻知其香，舌嘗其味，身觸其光，心以法緣，一切皆得甚深法忍，住不退轉。至成佛道，六根清徹，無諸惱患。阿難，若彼國土天人見此樹者，得三法忍：

一者音響忍，二者柔順忍，三者無生法忍。

此皆無量壽佛威神力故、

本願力故、滿足願故、明了願故、堅固願故、究竟願故。佛告阿難：世間帝王有百千音樂。自轉輪聖王，乃至第六天上伎樂音聲，展轉相勝千億萬倍。第六天上萬種樂音，不如無量壽國諸七寶樹一種音聲，千億倍也。

戊二、明伎樂

亦有自然萬種伎樂。又其樂聲，無非法音。清暢哀亮，微妙和雅。十方世界音聲之中，最為第一。

戊三、明講堂宮殿等

又講堂、精舍、宮殿、樓觀，皆七寶莊嚴，自然化成。復以真珠、明月摩尼眾寶以為交露，覆蓋其上。

戊四、明寶池

內外左右，有諸浴池。或十由旬，或二十、三十，乃至百千由旬。縱廣深淺，皆各一等。

八功德水，湛然盈滿。清淨香潔，味如甘露。黃金池者，底白銀沙；白銀池者，底黃金沙；水精池者，底琉璃沙；琉璃池者，底水精沙；珊瑚池者，底琥珀沙；琥珀池者，底珊瑚沙；磲磔池者，底瑪瑙沙；瑪瑙池者，底磲磔沙；白玉池者，底紫金沙；紫金池者，底白玉沙。或二寶、三寶，乃至七寶，轉共合成。其池岸上有栴檀樹，華葉垂布，香氣普熏。天優鉢羅華、鉢曇摩華、拘物頭華、分陀利華，雜色光茂，彌覆水上。彼諸菩薩、及聲聞眾，若入寶池，意欲令水沒足，水即沒足；欲令至膝，即至于膝；欲令至腰，水即至腰；欲令至頸，水即至頸；欲令灌身，自然灌身；欲令還復，水輒還復。調和冷煖，自然隨意。

開神悅體，蕩除心垢。清明澄潔，淨若無形。寶沙映徹，無深不照。微瀾迴流，轉相灌注。安詳徐逝，不遲不疾。波揚無量自然妙聲。

隨其所應，莫不聞者。或聞佛聲、或聞法聲、或聞僧聲；或寂靜聲、空無我聲、大慈悲聲、波羅蜜聲；或十力、無畏、不共法聲、諸通慧聲、無所作聲、不起滅聲、無生忍聲；乃至甘露灌頂，眾妙法聲。如是等聲，稱其所聞，歡喜無量。隨順清淨離欲、寂滅真實之義，

隨順三寶力、無所畏、不共之法。隨順通慧菩薩、聲聞所行之道。無有三塗苦難之名，

但有自然快樂之音。是故其國名曰極樂。

丁四、約土明其人民四

戊一、他方新往生者正報微妙

阿難，彼佛國土諸往生者，具足如是清淨色身。諸妙音聲，神通功德。

戊二、他方新往生者依報殊勝

所處宮殿、衣服、飲食、眾妙華香、莊嚴之具，猶第六天自然之物。

若欲食時，七寶應器，自然在前。金、銀、琉璃、磑磑、瑪瑙、珊瑚、琥珀、明月真珠，如是眾鉢，隨意而至。百味飲食，自然盈滿。雖有此食，實無食者。但見色、聞香，意以為食，自然飽足。身心柔軟，無所味著。事已化去，時至復現。

彼佛國土清淨安隱，微妙快樂，次於無為泥洹之道。

戊三、舊住者正報微妙

其諸聲聞、菩薩、天人，智慧高明，神通洞達。

咸同一類，形無異狀。但因順餘方，故有天人之名。顏貌端正，超世希有，容色微妙。非天非人，皆受自然虛無之身，無極之體。

佛告阿難，譬如世間貧窮乞人在帝王邊，形貌容狀，寧可類乎？阿難白佛：假令此人在帝王邊，羸陋醜惡無以為喻。百千萬億不可計倍。

所以然者？貧窮乞人，底極廝下。衣不蔽形，食趣支命，飢寒困苦，人理殆盡。皆坐前世不植德本，積財不施，富有益慳。但欲唐得，貪求無厭。不信修善，犯惡山積。如是壽終，財寶消散。苦身積聚，為之憂惱，於己無益，徒為他有。無善可怙，無德可恃。是故死墮惡趣，受此長苦。罪畢得出，生為下賤，愚鄙斯極，示同人類。

所以世間帝王，人中獨尊。皆由宿世積德所致。慈惠博施，仁愛兼濟，履信修善，無所違諍。是以壽終福應，得昇善道。上生天上，享茲福樂。積善餘慶，今得為人，遇生王家。自然尊貴，儀容端正，眾所敬事。妙衣珍膳，隨心服御。宿福所追，故能致此。佛告阿難，汝言是也。

計如帝王，雖人中尊貴，形色端正。比之轉輪聖王，甚為鄙陋，猶彼乞人在帝王邊。轉輪聖王，威相殊妙，天下第一。比忉利天王，又復醜惡不得相喻萬億倍也。

假令天帝，比第六天王，百千萬億倍，不相類也。設第六天王，比無量壽佛國菩薩聲聞，光顏容色，不相及逮，百千萬億不可計倍。

戊四、舊住者依報殊勝

佛告阿難：無量壽國其諸天人，衣服、飲食、華、香、瓔珞，諸蓋、幢、幡，微妙音聲，所居舍宅、宮殿、樓閣，稱其形色，高下大小。

或一寶、二寶、乃至無量眾寶，隨意所欲，應念即至。

又以眾寶妙衣，遍布其地。一切天人，踐之而行。

無量寶網，彌覆佛土。皆以金縷、真珠、百千雜寶，奇妙珍異，莊嚴校飾。周匝四面，垂以寶鈴，光色晃曜，盡極嚴麗。

自然德風，徐起微動。其風調和，不寒不暑。溫涼柔軟，不遲不疾。吹諸羅網，及眾寶樹。演發無量微妙法音，流布萬種溫雅德香。其有聞者，塵勞垢習，自然不起。風觸其身，皆得快樂。譬如比丘得滅盡三昧。

又風吹散華，遍滿佛土。隨色次第，而不雜亂。柔軟光澤，馨香芬烈。足履其上，陷下四寸。隨舉足已，還復如故。華用已訖，地輒開裂，以次化沒，清淨無遺。隨其時節，風吹散華，如是六反。又眾寶蓮華，周滿世界。一一寶華百千億葉。

其華光明，無量種色。青色青光，白色白光，玄、黃、朱、紫，光色赫然，煒煒燦爛，明曜日月。一一華中，出三十六百千億光。

一一光中，出三十六百千億佛。身色紫金，相好殊特。

一一諸佛，又放百千光明，

普為十方說微妙法。如是諸佛，各各安立無量眾生於佛正道。

佛告阿難：無量壽國其諸天人，衣服、飲食、華、香、瓔珞，諸蓋、幢、幡，微妙音聲，所居舍宅、宮殿、樓閣，稱其形色，高下大小。

或一寶、二寶、乃至無量眾寶，隨意所欲，應念即至。

又以眾寶妙衣，遍布其地。一切天人，踐之而行。

無量寶網，彌覆佛土。皆以金縷、真珠、百千雜寶，奇妙珍異，莊嚴校飾。周匝四面，垂以寶鈴，光色晃曜，盡極嚴麗。

自然德風，徐起微動。其風調和，不寒不暑。溫涼柔軟，不遲不疾。吹諸羅網，及眾寶樹。演發無量微妙法音，流布萬種溫雅德香。其有聞者，塵勞垢習，自然不起。風觸其身，皆

得快樂。譬如比丘得滅盡三昧。

又風吹散華，遍滿佛土。隨色次第，而不雜亂。柔軟光澤，馨香芬烈。足履其上，陷下四寸。隨舉足已，還復如故。華用已訖，地輒開裂，以次化沒，清淨無遺。隨其時節，風吹散華，如是六反。又眾寶蓮華，周滿世界。一一寶華百千億葉。

其華光明，無量種色。青色青光，白色白光，玄、黃、朱、紫，光色赫然，煒燁煥爛，明曜日月。一一華中，出三十六百千億光。

一一光中，出三十六百千億佛。身色紫金，相好殊特。

一一諸佛，又放百千光明，

普為十方說微妙法。如是諸佛，各各安立無量眾生於佛正道。

乙三、明其所攝_四

丙一、攝下人同生彼國_三

丁一、彰生彼住正定聚，令人慕求

佛告阿難：其有眾生生彼國者，皆悉住於正定之聚。所以者何？彼佛國中，無諸邪聚，及不定之聚。

丁二、舉聞名者，皆得往生，增人去心

十方恒沙諸佛如來，皆共讚歎無量壽佛威神功德，不可思議。

諸有眾生聞其名號，信心歡喜，乃至一念。至心迴向，願生彼國。即得往生，住不退轉。

唯除五逆，誹謗正法

丁三、正辨生業，教修往生_二

戊一、總舉

佛告阿難：十方世界諸天人民，其有至心願生彼國，凡有三輩：

戊二、別顯_三

己一、上輩

十方恒沙諸佛如來，皆共讚歎無量壽佛威神功德，不可思議。

諸有眾生聞其名號，信心歡喜，乃至一念。至心迴向，願生彼國。即得往生，住不退轉。唯除五逆，誹謗正法。

其上輩者：

捨家棄欲，而作沙門。發菩提心，

一向專念無量壽佛，

修諸功德，

願生彼國。

此等眾生臨壽終時，無量壽佛與諸大眾，現其人前。

即隨彼佛往生其國，便於七寶華中，自然化生。

住不退轉。

智慧勇猛，神通自在。

是故阿難，其有眾生欲於今世見無量壽佛，應發無上菩提之心，修行功德，願生彼國。

己二、中輩

佛告阿難，其中輩者：十方世界諸天人民，其有至心願生彼國。雖不能行作沙門，大修功德。當發無上菩提之心，

一向專念無量壽佛，多少修善：奉持齋戒，起立塔像，飯食沙門，懸繒然燈，散華燒香。

以此迴向，願生彼國。其人臨終，無量壽佛化現其身。光明相好，具如真佛。與諸大眾，現其人前。

即隨化佛，往生其國。

住不退轉，功德智慧，次如上輩者也。

己三、下輩

佛告阿難，其下輩者：十方世界，諸天人民，其有至心欲生彼國。

假使不能作諸功德。

當發無上菩提之心，

一向專意，乃至十念，念無量壽佛，願生其國。
若聞深法，歡喜信樂，不生疑惑。乃至一念，念於彼佛。
以至誠心，願生其國。
此人臨終，夢見彼佛，亦得往生。功德智慧，次如中輩者也

丙二、攝取上人同往彼國_二

丁一、略辨

佛告阿難：無量壽佛威神無極。
十方世界，無量無邊不可思議諸佛如來，莫不稱歎。
於彼東方恒沙佛國，無量無數諸菩薩眾，皆悉往詣無量壽佛所。
恭敬供養，及諸菩薩聲聞大眾。聽受經法，宣布道化。
南西北方，四維上下，亦復如是。

丁二、廣論_二

戊一、序列

爾時世尊，而說頌曰：

戊二、正頌_二

己一、頌上後段菩薩共往_三

庚一、頌前同往

東方諸佛國	其數如恒沙	彼土菩薩眾	往觀無量覺
南西北四維	上下亦復然	彼土菩薩眾	往觀無量覺

庚二、頌前文中恭敬供養

一切諸菩薩	各齎天妙華	寶香無價衣	供養無量覺
咸然奏天樂	暢發和雅音	歌歎最勝尊	供養無量覺
究達神通慧	遊入深法門		
具足功德藏	妙智無等倫		
慧日朗世間	消除生死雲		
恭敬遶三匝	稽首無上尊		

見彼嚴淨土 微妙難思議 因發無量心 願我國亦然

庚三、頌前聽法宣布道化

應時無量尊 動容發欣笑 口出無數光 遍照十方國
迴光圍遶身 三匝從頂入 一切天人眾 踊躍皆歡喜
大士觀世音 整服稽首問 白佛何緣笑 唯然願說意
梵聲猶雷震 八音暢妙響
當授菩薩記 今說仁諦聽
十方來正士 吾悉知彼願 志求嚴淨土 受決當作佛
覺了一切法 猶如夢幻響 滿足諸妙願 必成如是刹
知法如電影 究竟菩薩道 具諸功德本 受決當作佛
通達諸法性 一切空無我 專求淨佛土 必成如是刹

己二、頌上初段諸佛同嘆二

庚一、頌前十方諸佛共歎

諸佛告菩薩 令覲安養佛
聞法樂受行
疾得清淨處
至彼嚴淨國 便速得神通
必於無量尊 受記成等覺
其佛本願力 聞名欲往生
皆悉到彼國 自致不退轉
菩薩興志願 願己國無異 普念度一切 名顯達十方
奉事億如來 飛化遍諸刹 恭敬歡喜去 還到安養國

庚二、頌前文中釋迦自歎三

辛一、舉經難聞

若人無善本 不得聞此經
清淨有戒者 乃獲聞正法
曾更見世尊 則能信此事
謙敬聞奉行 踊躍大歡喜
憍慢弊懈怠 難以信此法
宿世見諸佛 樂聽如是教

辛二、佛智德殊勝，令人歸趣

聲聞或菩薩 莫能究聖心
譬如從生盲 欲行開導人
如來智慧海 深廣無涯底 二乘非所測
唯佛獨明了
假使一切人 具足皆得道 淨慧知本空 億劫思佛智
窮力極講說 盡壽猶不知
佛慧無邊際 如是致清淨

辛三、以理教勸

壽命甚難得 佛世亦難值 人有信慧難 若聞精進求
聞法能不忘 見敬得大慶 則我善親友 是故當發意
設滿世界火 必過要聞法
會當成佛道 廣濟生死流

丙三、重攝下人同生彼國^三

丁一、廣舉無量壽國勝妙之事，令人願求^二

戊一、廣舉無量壽國勝樂之事^八

己一、彰彼國壽命長遠

佛告阿難：彼國菩薩，皆當究竟一生補處。除其本願，為眾生故，以弘誓功德而自莊嚴，普欲度脫一切眾生。

己二、彰彼眾光明殊妙

阿難，彼佛國中諸聲聞眾，身光一尋。菩薩光明，照百由旬。

有二菩薩，最尊第一，威神光明，普照三千大千世界。

阿難白佛：彼二菩薩，其號云何？

佛言：一名觀世音，二名大勢至。是二菩薩，於此國土修菩薩行，命終轉化生彼佛國。

己三、彰彼眾身相具足

阿難，其有眾生生彼國者，皆悉具足三十二相。

己四、彰彼眾智德殊勝

智慧成滿，深入諸法。

究暢要妙，

神通無礙。諸根明利。

其鈍根者，成就二忍。其利根者，得阿僧祇無生法忍。

己五、彰彼生永離惡趣

又彼菩薩，乃至成佛，不更惡趣。神通自在，常識宿命。除生他方五濁惡世，示現同彼，如我國也。

己六、彰彼土興供養多

佛語阿難：彼國菩薩承佛威神，一食之頃，往詣十方無量世界，恭敬供養諸佛世尊。

隨心所念，華香伎樂，繒蓋幢幡，無數無量供養之具，自然化生，應念即至。珍妙殊特，非世所有。輒以奉散諸佛、菩薩、聲聞大眾。在虛空中，化成華蓋，光色昱爍，香氣普熏。其華周圓四百里者，如是轉倍，乃覆三千大千世界。隨其前後，以次化沒。

其諸菩薩，僉然欣悅。於虛空中，共奏天樂，以微妙音，歌歎佛德。聽受經法，歡喜無量。

供養佛已，未食之前，忽然輕舉，還其本國。

己七、彰彼生聞法不絕

佛語阿難：無量壽佛為諸聲聞、菩薩、大眾頒宣法時，都悉集會七寶講堂，廣宣道教，演暢妙法。

莫不歡喜，心解得道。

即時四方自然風起，吹七寶樹，出五音聲。無量妙華，隨風四散，自然供養，如是不絕。一切諸天，皆齎天上百千華香，萬種伎樂，供養其佛，及諸菩薩、聲聞之眾。普散華香，奏諸音樂，前後來往，更相開避。當斯之時，熙怡快樂，不可勝言。

己八、彰彼菩薩行德圓備_二

庚一、別_七

辛一、行修離過

佛告阿難：生彼佛國諸菩薩等，所可講說，常宣正法。隨順智慧，無違無失。

於其國土所有萬物，無我所心，
無染著心。

去來進止，情無所係，隨意自在。

無所適莫，無彼無我，無競無訟。

於諸眾生，得大慈悲饒益之心，柔軟調伏。無忿恨心，離蓋清淨。無厭怠心、等心、勝心、深心。

定心。

愛法、樂法、喜法之心。滅諸煩惱，
離惡趣心。究竟一切菩薩所行。

辛二、成德圓備

具足成就無量功德。

得深禪定，諸通明慧，遊志七覺。

修心佛法。

肉眼清徹，靡不分了；

天眼通達，無量無限；

法眼觀察，究竟諸道；

慧眼見真，能度彼岸；

佛眼具足，覺了法性。

以無礙智，為人演說。

辛三、行修具足

等觀三界，空無所有。

志求佛法。

具諸辯才。

除滅眾生煩惱之患。

從如來生，解法如如。

善知習滅音聲方便。不欣世語，樂在正論。修諸善本，志

崇佛道。

知一切法，皆悉寂滅。 生身煩惱，二餘俱盡。
聞甚深法，心不疑懼， 常能修行。
其大悲者，
深遠微妙，
靡不覆載。

辛四、成德殊勝

究竟一乘
至于彼岸。
決斷疑網，慧由心出。 於佛教法，該羅無外。
智慧如大海。
三昧如山王。 慧光明淨，超踰日月。
清白之法，具足圓滿，猶如雪山。 照諸功德，等一淨故。
猶如大地，淨穢好惡無異心故。猶如淨水，洗除塵勞諸垢染
故。猶如火王，燒滅一切煩惱薪故。猶如大風，行諸世界無障閼
故。猶如虛空，於一切有無所著故。猶如蓮華，於諸世間無染污
故。
猶如大乘，運載群萌出生死故。猶如重雲，震大法雷覺未覺
故。猶如大雨，雨甘露法潤眾生故。如金剛山，眾魔外道不能動
故。如梵天王，於諸善法最上首故。如尼拘類樹，普覆一切故。
如優曇鉢華，希有難遇故。如金翅鳥，威伏外道故。如眾遊禽，
無所藏積故。猶如牛王，無能勝故。猶如象王，善調伏故。如師
子王，無所畏故。曠若虛空，大慈等故。

辛五、行修增進

摧滅嫉心，不忌勝故。 專樂求法，心無厭足。 常欲廣說，
志無疲倦。
擊法鼓，建法幢，曜慧日，除癡闇。 修六和敬。
常行法施。 志勇精進，心不退弱。
為世燈明，最勝福田。 常為師導，等無憎愛。 唯樂正道，
無餘欣感。 拔諸欲刺，以安群生。
功德殊勝，莫不尊敬。 滅三垢障。

遊諸神通。

辛六、諸力具足

因力、緣力。 意力、願力。

方便之力、常力、善力。

定力、慧力。 多聞之力。

施、戒、忍辱、精進、禪定、智慧之力。 正念正觀，諸通明力。 如法調伏諸眾生力。 如是等力一切具足。

辛七、總嘆顯勝

身色相好，功德辯才。

具足莊嚴，無與等者。

恭敬供養無量諸佛。

常為諸佛所共稱歎。

究竟菩薩諸波羅蜜。

修空、無相、無願三昧，不生不滅諸三昧門。

遠離聲聞緣覺之地。

庚二、總結

阿難！彼諸菩薩成就如是無量功德，我但為汝略言之耳。若廣說者，百千萬劫不能窮盡。

戊二、勸人往生

佛告彌勒菩薩，

諸天人等。

無量壽國聲聞菩薩，功德智慧不可稱說。 又其國土微妙安樂，清淨若此。 何不力為善？

念道之自然，著於無上下，洞達無邊際。 宜各勤精進，努力自求之。 必得超絕去，

往生安養國。 橫截五惡趣，惡趣自然閉， 昇道無窮極。

易往而無人， 其國不逆違，

自然之所牽，

何不棄世事，勤行求道德？ 可獲極長生，壽樂無有極。

丁二、明娑婆界穢惡充滿，使人厭捨^四

戊一、舉三毒煩惱之過^三

己一、明貪過

然世人薄俗，共諍不急之事。

於此劇惡極苦之中，勤身營務，以自給濟。

無尊無卑，無貧無富。少長男女

共憂錢財，有無同然。憂思適等，屏營愁苦，累念積慮。

為心走使，無有安時。有田憂田，有宅憂宅，牛馬六畜、奴婢、錢財、衣食什物，復共憂之。

重思累息，憂念愁怖。橫為非常水火盜賊怨家債主，焚漂劫奪消散磨滅。憂毒忪忪無有解時，結憤心中不離憂惱，心堅意固適無縱捨。或坐摧碎，身亡命終。棄捐之去，莫誰隨者。尊貴豪富，亦有斯患。憂懼萬端，勤苦若此。結眾寒熱，與痛共俱。

貧窮下劣，困乏常無。無田亦憂欲有田，無宅亦憂欲有宅，無牛馬六畜、奴婢錢財、衣食什物，亦憂欲有之。

適有一復少一，有是少是，思有齊等。

適欲具有，便復糜散，如是憂苦。

當復求索，不能時得，思想無益，身心俱勞，坐起不安，憂念相隨，勤苦若此。

亦結眾寒熱，與痛共俱。或時坐之終身夭命。不肯為善，行道進德。壽終身死，當獨遠去。有所趣向，善惡之道，莫能知者。

己二、明瞋過

世間人民，父子兄弟夫婦家室中外親屬，當相敬愛無相憎嫉。有無相通無得貪惜，言色常和莫相違戾。

或時心諍有所恚怒，今世恨意微相憎嫉，後世轉劇至成大怨。所以者何？世間之事，更相患害。雖不即時應急相破，然含毒畜怒，結憤精神，自然剋識，不得相離。皆當對生，更相報復。

人在世間，愛欲之中，獨生獨死，獨去獨來。當行至趣苦樂之地，身自當之，無有代者。善惡變化，殃福異處。宿豫嚴待。當獨趣入，遠到他所，莫能見者，善惡自然追行。

所生窈窈冥冥，別離久長。道路不同，會見無期。甚難甚難，

復得相值。何不棄眾事，各遇強健時，努力勤修善。精進願度世，可得極長生。如何不求道，安所須待，欲何樂乎？

己三、明癡過

如是世人，不信作善得善，為道得道。不信人死更生，惠施得福。善惡之事都不信之，謂之不然，終無有是。

但坐此故，且自見之。更相瞻視，先後同然。

轉相承受父餘教令。先人祖父素不為善，

不識道德，身愚神闇，心塞意閉。死生之趣，善惡之道，自不能見，無有語者。吉凶禍福，競各作之，無一怪也。生死常道，轉相嗣立。或父哭子，或子哭父，兄弟夫婦更相哭泣，顛倒上下。無常根本，皆當過去，不可常保。

教語開導，信之者少。是以生死流轉，無有休止。

如此之人，矇冥抵突，不信經法。心無遠慮，各欲快意。癡惑於愛欲，不達於道德。迷沒於瞋怒，貪狼於財色。坐之不得道，當更惡趣苦，生死無窮已。

哀哉甚可傷。

或時室家父子兄弟夫婦，一死一生，更相哀愍。恩愛思慕，憂念結縛，心意痛著，迭相顧戀。窮日卒歲，無有解已。教語道德，心不開明。

思想恩好，不離情欲。惛矇閉塞，愚惑所覆。不能深思熟計，心自端正，專精行道，決斷世事。便旋至竟，年壽終盡，不能得道，無可奈何。總猥憤擾，皆貪愛欲。惑道者眾，悟之者寡。世間忽忽，無可聊賴。尊卑上下，貧富貴賤，勤苦忽務。各懷殺毒，惡氣窈冥，為妄興事。違逆天地，不從人心。

自然非惡，先隨與之。恣聽所為，待其罪極，其壽未盡，便頓奪之，下入惡道。累世懃苦，展轉其中，數千億劫，無有出期。痛不可言，甚可哀愍。

戊二、勸人修捨

己一、正勸修捨

佛告彌勒菩薩諸天人等：我今語汝，世間之事，人用是故，坐不得道。

當熟思計，遠離眾惡。擇其善者，勤而行之。
愛欲榮華不可常保，皆當別離，無可樂者。
遇佛在世，當勤精進。其有至願生安樂國者，可得 智慧明達， 功德殊勝。
勿得隨心所欲，虧負經戒，在人後也。
儻有疑意，不解經者，可具問佛，當為說之。

己二、彌勒領解

彌勒菩薩長跪白言：佛威神尊重，所說快善。聽佛經語，貫心思之，世人實爾。如佛所言：今佛慈愍，顯示大道。耳目開明，長得度脫。聞佛所說，莫不歡喜。諸天人民蠕動之類，皆蒙慈恩，解脫憂苦。

佛語教誡，甚深甚善。智慧明見八方上下去來今事，莫不究暢。

今我眾等，所以蒙得度脫，皆佛前世求道之時，謙苦所致。

恩德普覆，福祿巍巍，光明徹照。

達空無極。

開入泥洹，教授典攬。

威制消化，感動十方，無窮無極。

佛為法王，尊超眾聖，普為一切天人之師。隨心所願，皆令得道。

今得值佛，復聞無量壽聲，靡不歡喜，心得開明。

己三、重勸修捨^四

庚一、歎前彌勒領荷佛恩

佛告彌勒：汝言是也。若有慈敬於佛者，實為大善。天下久久乃復有佛。

今我於此世作佛，演說經法，宣布道教。

斷諸疑網，拔愛欲之本。杜眾惡之源。

遊步三界，無所拘礙。典攬智慧，眾道之要。

執持綱維，昭然分明，開示五趣。

度未度者，決正生死，泥洹之道。

庚二、慶前彌勒值佛聞法

彌勒當知，汝從無數劫來，修菩薩行，欲度眾生，其已久遠。
從汝得道，至于泥洹，不可稱數。汝及十方諸天人民一切
四眾，永劫已來，展轉五道，憂畏勤苦，不可具言。乃至今世，
生死不絕。與佛相值，聽受經法，又復得聞無量壽佛。
快哉甚善，吾助爾喜。

庚三、正勸修行

汝今亦可自厭生死老病痛苦，
惡露不淨，無可樂者，宜自決斷。端身正行，
益作諸善。
修己潔體，洗除心垢。言行忠信，
表裏相應。
人能自度，
轉相拯濟，
精明求願，積累善本。
雖一世勤苦，須臾之間，後生無量壽佛國，快樂無極。長
與道德合明。
永拔生死根本，
無復貪恚愚癡，苦惱之患。
欲壽一劫百劫千億萬劫，自在隨意，皆可得之。
無為自然，次於泥洹之道。

庚四、勸捨疑惑

汝等宜各精進，求心所願。無得疑惑中悔，自為過咎。生彼
邊地七寶宮殿，五百歲中受諸厄也。

己四、彌勒領行

彌勒白言：受佛重誨，專精修學，如教奉行，不敢有疑。

戊三、舉五惡五痛五燒苦之過三

己一、總

佛告彌勒：汝等能於此世端心正意，不作眾惡，甚為至德。

十方世界最無倫匹。

所以者何？諸佛國土天人之類，自然作善，不大為惡，易可開化。

今我於此世間作佛，

處於五惡五痛五燒之中，為最劇苦，教化群生。令捨五惡，令去五痛，令離五燒。

降化其意，令持五善，獲其福德，度世長壽泥洹之道。

己二、別二

庚一、問前起後

佛言：何等為五惡？何等五痛？何等五燒？何等消化五惡，令持五善，獲其福德度世長壽泥洹之道？

庚二、對辨五

辛一、第一門

其一惡者：

諸天人民蠕動之類，

欲為眾惡，莫不皆然。強者伏弱，轉相剋賊。殘害殺戮，迭相吞噬。不知修善，惡逆無道。後受殃罰，自然趣向。神明記識，犯者不赦。故有貧窮下賤乞匄孤獨聾盲瘡啞愚癡慳惡，至有尪狂不逮之屬。

又有尊貴豪富，高才明達。皆由宿世慈孝，修善積德所致。

世有常道王法牢獄，不肯畏慎。為惡入罪，受其殃罰，求望解脫，難得免出。世間有此目前現事。壽終後世尤深尤劇，入其幽冥，轉生受身。譬如王法痛苦極刑，故有自然三塗，無量苦惱。轉貿其身，改形易道，所受壽命或長或短，魂神精識自然趣之。當獨值向，相從共生，更相報復，無有止已。殃惡未盡不得相離，展轉其中無有出期，難得解脫，痛不可言。天地之間自然有是，雖不即時卒暴應至，善惡之道會當歸之。是為一大惡一痛一燒，勤苦如是。譬如大火焚燒人身。

人能於中一心制意，端身正行，獨作諸善，不為眾惡者。身獨度脫，

獲其福德，度世上天泥洹之道。是為一大善也。

辛二、第二門

佛言：其二惡者，

世間人民，父子兄弟室家夫婦，都無義理，不順法度。

奢婬僞縱，各欲快意。

任心自恣，更相欺惑。心口各異，言念無實。佞諂不忠，巧言諛媚，嫉賢謗善，陷入冤枉。主上不明任用臣下，臣下自在機偽多端。踐度能行，知其形勢。在位不正，為其所欺。妄損忠良，不當天心。臣欺其君，子欺其父，兄弟夫婦，中外知識，更相欺誑。各懷貪欲瞋恚愚癡，欲自厚己，欲貪多有。尊卑上下心俱同然。破家亡身不顧前後，親屬內外坐之滅族。或時室家知識鄉黨市里愚民野人，轉共從事，更相剝害，忿成怨結。富有慳惜不肯施與，愛保貪重心勞身苦。如是至竟無所恃怙，獨來獨去無一隨者。善惡禍福追命所生，或在樂處，或入苦毒，然後乃悔，當復何及？世間人民心愚少智，見善憎謗不思慕及，但欲為惡妄作非法。常懷盜心悻望他利，消散磨盡而復求索。邪心不正懼人有色，不豫思計事至乃悔。

今世現有王法牢獄，隨罪趣向，受其殃罰。

因其前世不信道德，不修善本，今復為惡。天神剋識，別其名籍，壽終神逝下入惡道。故有自然三塗，無量苦惱，展轉其中。世世累劫無有出期，難得解脫，痛不可言。是為二大惡二痛二燒，勤苦如是。譬如大火焚燒人身。人能於中一心制意，端身正行，獨作諸善，不為眾惡者。

身獨度脫，

獲其福德，度世上天泥洹之道。

是為二大善也。

辛三、第三門

佛言：其三惡者，

世間人民相因寄生，共居天地之間，處年壽命無能幾何。上有賢明長者尊貴豪富，下有貧窮廝賤阨劣愚夫，中有不善之人。常懷邪惡，但念婬妬，煩滿胸中，愛欲交亂坐起不安。貪意守惜但欲唐得，眄睠細色邪態外逸。自妻厭憎私妄出入，費損家財事為非法。

交結聚會，興師相伐，攻劫殺戮，強奪不道。惡心在外，不自修業，盜竊趣得。欲擊成事，恐勢迫脅，歸給妻子。恣心快意，極身作樂。或於親屬不避尊卑，家室中外患而苦之。亦復不畏王法禁令。如是之惡，著於人鬼，日月照見，神明記識。故有自然三塗，無量苦惱，展轉其中。世世累劫，無有出期，難得解脫，痛不可言。是為三大惡三痛三燒，勤苦如是。

譬如大火焚燒人身。人能於中一心制意，端身正行，獨作諸善，不為眾惡者。

身獨度脫，
獲其福德，度世上天泥洹之道。
是為三大善也。

辛四、第四門

佛言：其四惡者，
世間人民，

不念修善，轉相教令，共為眾惡。兩舌、惡口、妄言、綺語、讒賊鬪亂。憎嫉善人，敗壞賢明，於傍快喜。不孝二親，輕慢師長。朋友無信，難得誠實。尊貴自大，謂己有道。橫行威勢，侵易於人。不能自知，為惡無恥，自以強健，欲人敬難。不畏天地神明日月，不肯作善，難可降化。自用偃蹇，謂可常爾，無所憂懼，常懷憍慢。如是眾惡，天神記識。賴其前世頗作福德，小善扶接，營護助之。今世為惡，福德盡滅，諸善神鬼各去離之。身獨空立，無所復依。壽命終盡，諸惡所歸，自然迫促共趣奪之。又其名籍記在神明，殃咎牽引，當往趣向。罪報自然無從捨離，但得前行入於火鑊，身心摧碎精神痛苦，當斯之時悔復何及？天道自然不得蹉跌。故有自然三塗，無量苦惱，展轉其中。世世累劫，無有出期，難得解脫，痛不可言。

是為四大惡四痛四燒，勤苦如是。

譬如大火焚燒人身。

人能於中一心制意，端身正行，獨作諸善，不為眾惡。身獨度脫，

獲其福德，度世上天泥洹之道。是為四大善也。

辛五、第五門

佛言：其五惡者，
世間人民。

徙倚懈惰，不肯作善，治身修業，家室眷屬飢寒困苦。父母教誨，瞋目怒應，言令不和，違戾反逆，譬如怨家，不如無子。取與無節，眾共患厭。負恩違義，無有報償之心。貧窮困乏不能復得，辜較縱奪放恣遊散，串數唐得用自賑給。耽酒嗜美，飲食無度。肆心蕩逸，魯扈抵突。不識人情。強欲抑制，見人有善，憎嫉惡之。無義無禮，無所顧錄，自用職當不可諫曉。六親眷屬所資有無，不能憂念。不惟父母之恩，不存師友之義。心常念惡，口常言惡，身常行惡，曾無一善。不信先聖諸佛經法，不信行道可得度世，不信死後神明更生，不信作善得善為惡得惡。欲殺真人鬥亂眾僧，欲害父母兄弟眷屬，六親憎惡，願令其死。

如是世人心意俱然，愚癡矇昧，而自以智慧。不知生所從來，死所趣向。不仁不順，逆惡天地。

而於其中悵望僥倖，欲求長生，會當歸死。慈心教誨，令其念善。開示生死善惡之趣自然有是，而不信之。苦心與語，無益其人。心中閉塞，意不開解。

大命將終，悔懼交至。不豫修善臨窮方悔，悔之於後將何及乎？天地之間五道分明，恢廓窈冥浩浩茫茫，善惡報應禍福相承，身自當之無誰代者，數之自然。應其所行，殃咎追命，無得縱捨。善人行善，從樂入樂從明入明；惡人行惡，從苦入苦從冥入冥。誰能知者？獨佛知耳！教語開示，信用者少。生死不休，惡道不絕。如是世人難可具盡。故有自然三塗，無量苦惱。展轉其中，世世累劫無有出期，難得解脫，痛不可言。

是為五大惡五痛五燒，勤苦如是。譬如大火焚燒人身。

人能於中一心制意，端身正念，言行相副。所作至誠，所語如語，心口不轉。獨作諸善，不為眾惡者。身獨度脫，

獲其福德，度世上天泥洹之道。是為五大善也。

己三、重複總辨

佛告彌勒：吾語汝等，是世五惡勤苦若此，五痛五燒，展轉相生。但作眾惡不修善本，

皆悉自然入諸惡趣。
或其今世先被殃病，求死不得求生不得。罪惡所招，示眾見之。

身死隨行入三惡道，苦毒無量，自相焦然。
至其久後，共作怨結。從小微起，遂成大惡。
皆由貪著財色，不能施慧。癡欲所迫，隨心思想，煩惱結縛，無有解已。

厚己爭利，無所省錄。富貴榮華，當時快意，不能忍辱，不務修善。威勢無幾，隨以磨滅。

身坐勞苦，久後大劇。天道施張，自然糾舉。綱紀羅網，上下相應，晃晃忪忪。當入其中，古今有是，痛哉可傷。

佛語彌勒：世間如是，
佛皆哀之。

以威神力，摧滅眾惡，悉令就善。

棄捐所思，奉持經戒。受行道法，無所違失。

終得度世，泥洹之道。

戊四、勸人修捨

佛言：汝今諸天人民及後世人，得佛經語，當熟思之，能於其中端心正行。

主上為善，率化其下，轉相敕令，各自端守。尊聖敬善，仁慈博愛。佛語教誨，無敢虧負。當求度世，拔斷生死眾惡之本，永離三塗無量憂畏苦痛之道。

汝等於是廣殖德本。布恩施慧，勿犯道禁，忍辱、精進、一心、智慧。

轉相教化。

為德立善。

正心正意，齋戒清淨，一日一夜，勝在無量壽國為善百歲。

所以者何？彼佛國土無為自然，皆積眾善，無毛髮之惡。

於此修善十日十夜，勝於他方諸佛國中為善千歲。

所以者何？他方佛國為善者多，為惡者少，福德自然，無造惡之地。唯此間多惡，無有自然。勤苦求欲，轉相欺殆，心勞形困，飲苦食毒。如是忽務，未嘗寧息。

吾哀汝等天人之類，苦心誨喻，教令修善。隨宜開導，授與經法，莫不承用，在意所願皆令得道。佛所遊履國邑丘聚，靡不蒙化。天下和順，日月清明，風雨以時，災厲不起。國豐民安，兵戈無用，崇德興仁，務修禮讓。

佛言：我哀愍汝等諸天人民，甚於父母念子。今吾於此世作佛，降化五惡，消除五痛，絕滅五燒。以善攻惡，拔生死之苦，令獲五德，昇無為之安。吾去世後經道漸滅，人民諂偽復為眾惡。五燒五痛還如前法，久後轉劇不可悉說，我但為汝略言之耳。

佛告彌勒：汝等各善思之，轉相教誡，如佛經法無得犯也。於是彌勒菩薩合掌白言：佛所說甚善，世人實爾。如來普慈哀愍，悉令度脫。受佛重誨，不敢違失。

丁三、就彌陀國辦得彰失，令人修捨^五

戊一、佛勸阿難禮無量壽

佛告阿難：汝起，更整衣服，合掌恭敬禮無量壽佛。十方國土諸佛如來，常共稱揚讚歎彼佛，無著無礙。

戊二、阿難奉命敬禮彼佛，并願求見

於是阿難起整衣服，正身西向，恭敬合掌，五體投地，禮無量壽佛。

白言：世尊！願見彼佛，安樂國土，及諸菩薩聲聞大眾。

戊三、由前請，無量壽佛放光普照

說是語已，即時無量壽佛放大光明，普照一切諸佛世界。金剛圍山，須彌山王，大小諸山，一切所有皆同一色。譬如劫水彌滿世界，其中萬物沈沒不現。滉漾浩汗，唯見大水。彼佛光明亦復如是。聲聞菩薩一切光明皆悉隱蔽，唯見佛光明耀顯赫。

戊四、因佛光照，彼此相見

爾時阿難，即見無量壽佛威德巍巍，如須彌山王，高出一切諸世界上。相好光明，靡不照耀。

此會四眾一時悉見，彼見此土亦復如是。

戊五、因相見，具彰彼國得失之事，令人修捨

爾時佛告阿難及慈氏菩薩：汝見彼國，從地已上至淨居天。其中所有微妙嚴淨自然之物，為悉見不？

阿難對曰：唯然，已見！

汝寧復聞無量壽佛大音宣布一切世界，化眾生不？阿難對曰：唯然，已聞！

彼國人民乘百千由旬七寶宮殿，無所障閼，遍至十方供養諸佛，汝復見否？對曰：已見！

彼國人民有胎生者，汝復見不？對曰：已見！

其胎生者所處宮殿，或百由旬，或五百由旬。各於其中受諸快樂，如忉利天，亦皆自然。爾時慈氏菩薩白佛言：世尊！何因何緣，彼國人民胎生化生？佛告慈氏：若有眾生以疑惑心修諸功德，願生彼國。

不了佛智，

不思議智，不可稱智，大乘廣智，無等無倫最上勝智，於此諸智疑惑不信。

然猶信罪福，修習善本，願生其國。

此諸眾生生彼宮殿壽五百歲，常不見佛，不聞經法，不見菩薩聲聞聖眾。是故於彼國土，謂之胎生。

若有眾生明信佛智，乃至勝智，作諸功德，信心迴向。

此諸眾生於七寶華中自然化生，加趺而坐。須臾之頃，身相光明，智慧功德，如諸菩薩具足成就。復次，慈氏！他方諸大菩薩發心欲見無量壽佛，恭敬供養，及諸菩薩聲聞之眾。彼菩薩等命終得生無量壽國，於七寶華中自然化生。彌勒當知，彼化生者，智慧勝故。

其胎生者，皆無智慧。於五百歲中常不見佛，不聞經法，不見菩薩諸聲聞眾，無由供養於佛。不知菩薩法式，不得修習功德。當知此人宿世之時無有智慧，疑惑所致。

佛告彌勒：譬如轉輪聖王，別有宮室。七寶莊飾，張設床帳，懸諸繒幡。若有諸小王子得罪於王，輒內彼宮中，繫以金鎖，供給飲食衣服床蓐華香伎樂，如轉輪王無所乏少。於意云何：此諸

王子寧樂彼處不？

對曰：不也！

但種種方便求諸大力，欲自勉出。

佛告彌勒：此諸眾生亦復如是。以疑惑佛智，生彼宮殿，無有刑罰，乃至一念惡事。但於五百歲中不見三寶，不得供養，修諸善本，以此為苦。雖有餘樂，猶不樂彼處。若此眾生識其本罪，深自悔責，求離彼處。即得如意，往詣無量壽佛所，恭敬供養。亦得遍至無量無數諸如來所，修諸功德。彌勒當知：其有菩薩生疑惑者，為失大利。是故應當明信諸佛無上智慧。

丙四、重攝上人同生彼國

彌勒菩薩白佛言：世尊！於此世界，有幾所不退菩薩生彼佛國？

佛告彌勒：於此世界有六十七億不退菩薩往生彼國。一一菩薩已曾供養無數諸佛，次如彌勒者也。諸小行菩薩及修習少功德者不可稱計，皆當往生。

佛告彌勒：不但我刹諸菩薩等往生彼國，他方佛土亦復如是：

其第一佛名曰遠照，彼有百八十億菩薩皆當往生。其第二佛名曰寶藏，彼有九十億菩薩皆當往生。其第三佛名曰無量音，彼有二百二十億菩薩皆當往生。其第四佛名曰甘露味，彼有二百五十億菩薩皆當往生。其第五佛名曰龍勝，彼有十四億菩薩皆當往生。其第六佛名曰勝力，彼有萬四千菩薩皆當往生。其第七佛名曰師子，彼有五百億菩薩皆當往生。其第八佛名曰離垢光，彼有八十億菩薩皆當往生。其第九佛名曰德首，彼有六十億菩薩皆當往生。其第十佛名曰妙德山，彼有六十億菩薩皆當往生。其第十一佛名曰人王，彼有十億菩薩皆當往生。其第十二佛名曰無上華，彼有無數不可稱計諸菩薩眾，皆不退轉，智慧勇猛，已曾供養無量諸佛。於七日中即能攝取百千億劫大士所修堅固之法，斯等菩薩皆當往生。其第十三佛名曰無畏，彼有七百九十億大菩薩眾，諸小菩薩及比丘等不可稱計皆當往生。佛語彌勒：不但此十四佛國中諸菩薩等當往生也，十方世界無量佛國，其往生者亦復如是，甚多無數。我但說十方諸佛名號，及菩薩比丘生彼國者，晝

夜一劫尚未能竟，我今為汝略說之耳。

——正宗分 竟 ——

甲三、流通分_四

乙一、如來歎經勸學_五

丙一、勸人修行

佛告彌勒：其有得聞彼佛名號，歡喜踊躍，乃至一念。當知此人為得大利，則是具足無上功德。是故彌勒，設有大火充滿三千大千世界，要當過此，聞是經法。歡喜信樂，受持讀誦，如說修行。

所以者何？多有菩薩欲聞此經，而不能得。

若有眾生聞此經者，於無上道終不退轉。

是故應當專心信受，持誦說行。

丙二、教人請決

吾今為諸眾生說此經法，令見無量壽佛，及其國土一切所有。

所當為者皆可求之。無得以我滅度之後，復生疑惑。

丙三、彰此經法濟益之要

當來之世，經道滅盡。

我以慈悲哀愍，特留此經，止住百歲。其有眾生值斯經者，隨意所願，皆可得度。

丙四、舉經難聞生人敬重

佛語彌勒：如來興世，難值難見。

諸佛經道，難得難聞。菩薩勝法，諸波羅蜜，得聞亦難。

遇善知識，聞法能行，此亦為難。

若聞斯經，信樂受持，難中之難，無過此難。

丙五、結勸修學

是故我法如是作，如是說，如是教。應當信順，如法修行

乙二、彰說利益，諸人悟道

爾時世尊說此經法，無量眾生皆發無上正覺之心。萬二千那由他人得清淨法眼，二十二億諸天人民得阿那含，八十萬比丘漏盡意解。四十億菩薩得不退轉，以弘誓功德而自莊嚴，於將來世當成正覺。

乙三、增眾深信

爾時三千大千世界六種震動，大光普照十方國土，百千音樂自然而作，無量妙華芬芬而降。

乙四、大眾同喜

佛說經已，彌勒菩薩及十方來諸菩薩眾；長老阿難，諸大聲聞；一切大眾。聞佛所說，靡不歡喜。

——流通分 竟——

——無量壽經講表 竟——

佛說無量壽經 補充講表

◎ 附表一：釋「教起所因」義

大悲憫念末法，為作津梁者：佛成道時，已當濁世，況今末法？正入門爭，轉展陵夷。後之又後，皆賴此經神力，救拔餘生。豈非至極悲心，預垂濟度？

特於無量法門，出勝方便者：入道多門，本無揀擇。險夷曲直，難易攸分。則無量門中，念佛一門，最為方便。略陳有四：

不值佛世，得常見佛方便。

不斷惑業，得出輪迴方便。

不修餘行，得波羅密方便。

不經多劫，得疾解脫方便。

激揚生死凡夫，令起欣厭者：以諸眾生沈迷自性，甘受輪迴。曠劫至今，曾無省勵。故示苦樂兩土，爰開折攝二門，激之揚之，俾欣俾厭。勝心既發，淨業斯成。

化導二乘，執空不修淨土者：良以乍得我空，即生耽滯。聞說淨佛國土，教化眾生，心不喜樂。故令回小向大，發意往生。

勉進初心菩薩，親近如來者：初發心菩薩，大心雖建，勝忍未成。所謂弱羽止可纏枝，嬰兒猶應傍母。入正定聚，親彼世尊，方得忍證無生。終成佛果，乘大願筏，苦海度生，如智論中說。且夫六心墮落，塵劫聲聞。魚子菴羅，足為明鏡。故知念佛，菩薩之父，生育法身。乃至十地始終，不離念佛。何得

初心自足，不願往生？

盡攝利鈍諸根，悉皆度脫者：諸餘法門，高之則下機絕分；卑之則不被上根。是以華藏如盲，螢光增結。唯此一法，上下兼收。可謂萬病愈於阿伽；千器成於巨冶。豈不慈門廣大，普度無遺？

護持多障行人，不遭墮落者：末世修行，多諸障難，一虧正見，即陷群邪。彼佛願力威神，加被行人。大光明中，不遭魔事，能為護念，直至道場。故知澤圖辟怪，寶鏡遁妖，正念分明，無能燒者。

的指即有念心，得入無念者：心本無念，念起即乖。而眾生無始以來，妄想慣習，未易卒遣。今教念佛，是乃以毒攻毒，用兵止兵。病愈寇平，則捨病體更無自身；即寇盜原吾赤子。

巧示因於往生，實悟無生者：七地僅名現相，八地乃得無生。而亟欲滅生以求無生，彌求彌遠。今以求生淨土，乃悟無生，入有得空，即凡成聖。可謂通玄祕訣，換骨神丹。

復明徑路修行，徑中之徑者：餘門學道，萬里迢遙；念佛往生，古稱徑路。而念佛一法有多門，今此持名，是為徑路之中，徑而又徑。鶴沖鵬舉，驥驟龍飛。不疾不行，而速而至，徑中徑矣。

——《阿彌陀經疏鈔》——

◎ 附表二：無量壽經的翻譯與註解

(壹) 本經的翻譯版本：

		經 題	卷	譯 者	備 註
漢 地	尚 存	佛說無量清淨平等覺經 ^{亦直云無量清淨經} (漢譯本)	二卷	後漢月支三藏支婁迦讖	第二譯
		阿彌陀經 ^{內題云阿彌陀三耶三佛薩樓佛檀過度人道經} (吳譯本)	二卷	吳月支優婆塞支謙(字恭明)	第三譯
		佛說無量壽經(魏譯本)	二卷	曹魏天竺三藏康僧鎧	第四譯
		大寶積經無量壽如來會(唐譯本)	二卷	唐三藏菩提流志	第十一譯
		佛說大乘無量壽莊嚴經(宋譯本)	三卷	趙宋法賢	第十二譯
	逸 失	無量壽經	二卷	後漢安息三藏安世高	第一譯
		無量清淨平等覺經	二卷	曹魏西域三藏帛延	第五譯
		無量壽經 ^{亦云無量清淨平等覺經}	二卷	西晉三藏竺法護	第六譯
		無量壽至真等正覺經 ^{一名樂佛土樂經， 一名極樂佛土經}	一卷	東晉外國沙門竺法力	第七譯
		新無量壽經	二卷	東晉天竺三藏佛陀跋陀羅	第八譯
新無量壽經		二卷	宋涼州沙門釋寶雲譯	第九譯	
新無量壽經		二卷	宋罽賓三藏曇摩蜜多	第十譯	

- 西藏無量壽經的經題為《聖無量光莊嚴經》。
 - 十九世紀以來，在印度與尼泊爾漸次發現數百部古典梵文佛經，其中無量壽經的原文本有十三部。無量壽經的梵本經題為《樂有莊嚴經》。
 - 會集本(依經典原文刪改，僅作參考用)：
- 1、宋 王日休(王龍舒) 居士《大阿彌陀經》
(取漢吳魏宋四譯，會集而成)

2、清初 彭紹升（彭際清，彭二林）居士《無量壽經》

（乃取魏譯而刪節會集之，仍名無量壽經。）

3、清 咸豐中 魏源（魏承貫）居士《摩訶阿彌陀經》

（備取五譯，會集成一冊）

4、民國 夏蓮居居士《佛說大乘無量壽莊嚴清淨平等覺經》

（備取五譯，會集成一冊）

（貳） 本經的註解版本：

書 名	卷 數	作 者	簡 稱
無量壽經義疏	二 卷	隋淨影寺慧遠	淨影疏
無量壽經義疏	一 卷	唐嘉祥寺吉藏	嘉祥疏
無量壽經宗要	二 卷	新羅黃龍寺元曉	海東疏
無量壽經連義述文贊	二 卷	新羅璟興	璟興疏

—— 糅合《開元釋教錄》及《淨土宗教程》 ——

○ 註一：此外，依大藏會閱，日本有無量壽經之註解共五十餘家。

○ 註二：以上所列古來中外註解，皆註解魏譯本。

◎ 附表三：阿羅漢聖者簡介

德 號	梵 語	略 明 功 德
了本際	阿若多憍陳那 (Ajāta-kauṇḍīya)	五比丘之一。 <u>增壹阿含</u> ：「寬仁博識，善能勸化，將養聖眾，不失威儀。初受法味，思惟四諦。」
正 願	阿濕婆氏多 (Acvaṇṇita)	五比丘之一。 <u>增壹阿含</u> ：「威容端正，行步庠序，所謂馬師比丘是。」
正 語	婆濕婆 (Vaspa)	五比丘之一。佛陀入滅後，與大迦葉各於窟外、窟內之二處結集時，婆師波為窟外大眾之上首，自領界外大眾結集三藏，成為大眾部之祖。
大 號	摩訶那摩 (Mahānāma)	五比丘之一。 <u>增壹阿含</u> ：「速成神通，中不有悔。」
仁 賢	跋提梨迦 (Bhadrika)	五比丘之一。 <u>嘉祥疏</u> ：「德性軟和，故彰其名。」
離 垢	毘摩羅	唐譯「無垢」。 <u>嘉祥疏</u> ：「離破戒之垢。」
名 聞	耶 舍 (Yasa)	大富長者善覺之子。因厭離俗世，遂出家。僅次於五比丘，而為佛陀第六位弟子。
善 實	須菩提 (Subhūti)	為波羅奈城之長者，與耶舍長者、離垢、牛王等為友。後聞耶舍歸佛出家修行，乃與離垢等相攜詣佛所出家，終成阿羅漢。
具 足	富蘭那迦 (Purnaka)	
牛 王	憍梵波提 (Gavampati)	<u>增壹阿含</u> ：「居樂天上，不處人中。」
優樓頻 螺迦葉	(Kāśyapa)	<u>增壹阿含</u> ：「將養聖眾，四事供養。」
伽耶 迦葉	(Gāyā-kāśyapa)	<u>增壹阿含</u> ：「觀了諸法，都無所著。」
那提迦葉	(Nādi-kāśyapa)	<u>增壹阿含</u> ：「心意寂然，降伏諸結。」
摩訶 迦葉	(Mahā-kāśyapa)	<u>增壹阿含</u> ：「我弟子中第一比丘頭陀行者，所謂大迦葉是。」
舍利弗	(Śāriputra)	<u>增壹阿含</u> ：「智慧無窮，決了諸疑。」

大目 捷連	(Maudgalyayana)	<u>增壹阿含</u> ：「神足輕舉，飛到十方。」 <u>增壹阿含</u> ：「若舍利弗、目捷連所遊之方，彼方便為不空。所以然者？舍利弗、目捷連比丘，堪任降此外道」
劫賓那	(Mahakalpina)	<u>佛說給孤長者女得度因緣經</u> ：「常出軟語，眾所愛樂。佛說此人軟語第一。」 精通天文曆數，能知星宿，為眾僧中第一。
大住	摩訶俱絺羅 (Mahakausthila)	<u>增壹阿含</u> ：「得四辯才，觸難答對。」
大淨志	賴吒和羅 (Rastrapala)	<u>增壹阿含</u> ：「貴豪種族，出家學道。」
摩訶周那	摩訶槃特 (Mahapanthaka)	
滿願子	富樓那彌多羅尼子 (Purna-maitrayaniputra)	<u>增壹阿含</u> ：「能廣說法，分別義理。」
離障	阿尼盧陀 (Aniruddha)	佛弟子中天眼第一。
流灌	孫陀羅難陀 (Sundara-nanda)	<u>增壹阿含</u> ：「我聲聞中弟子端正者，難陀比丘是。諸根寂靜。是亦難陀比丘。」（此解依 <u>懺興疏</u> ）
堅伏	緊鼻哩拏 (Kanpila)	
面王		<u>增壹阿含</u> ：「著弊惡衣，無所羞恥。」
異乘		以其戒行穎萃，故稱異乘。
仁性	尸利羅 (Sivali)	其人秉性仁慈，福德圓滿。（見 <u>佛五百弟子自說本起經</u> ）
嘉樂	(Nanda)	
善來	娑伽陀 (Svagata)	<u>增壹阿含</u> ：「入火三昧，普照十方。」
羅云	羅怱羅 (Rahula)	<u>增壹阿含</u> ：「不毀禁戒，誦讀不懈」
阿難	阿難陀 (Ananda)	<u>增壹阿含</u> ：「我聲聞中第一比丘，知時明物，所至無疑。所憶不忘，多聞廣遠，堪任奉上。」

◎附表四：菩薩眾簡介

一、略明功德（依「聖道門」）

普賢菩薩

- 《華嚴經探玄記》：「德周法界曰『普』，至順調善曰『賢』。智論名『遍吉』也。」
- 《楞嚴經》：「普賢菩薩即從座起，頂禮佛足，而白佛言：我已曾與恒沙如來為法王子。十方如來教其弟子菩薩根者，修普賢行，從我立名。」
- 《普賢行願品》：「爾時普賢菩薩摩訶薩，稱歎如來勝功德已，告諸菩薩及善財言：善男子！如來功德，假使十方一切諸佛，經不可說不可說佛剎極微塵數劫，相續演說，不可窮盡。若欲成就此功德門，應修十種廣大行願。」

妙德菩薩

- 《法華義疏》：「德無不圓，累無不盡，稱妙德也。」
- 《佛說放鉢經》：「今我得佛，有三十二相、八十種好，威神尊貴，度脫十方一切眾生者，皆文殊師利之恩，本是我師。前過去無央數諸佛，皆是文殊師利弟子。當來者亦是其威神恩力所致。譬如世間小兒有父母，文殊者，佛道中父母也。」
- 《佛說首楞嚴三昧經》：「迦葉！過去久遠無量無邊不可思議阿僧祇劫，爾時有佛，號龍種上如來。於此世界南方，過於千佛國土，國名平等。：：：

迦葉！汝謂爾時平等世界，龍種上佛，豈異人乎？勿生此疑，所以者何，即文殊師利法王子是。」

慈氏菩薩

- 《華嚴經探玄記》：「彌勒者，梵語具言名迷帝隸。此云慈，是其姓也。以姓為名，名曰慈氏。然有三緣：一、由本願，謂過去值大慈佛，因則發願，願我成佛亦得斯名。二、由三昧名，下云見彌勒，初得慈心三昧，因以為名。三、就相立名，母懷時有慈心，相師占曰，由所懷子慈，令母慈也。」
- 《賢愚經》：「當來之世，人民壽八萬四千歲。彼時當有轉輪聖王，名曰勝伽。彼時當有婆羅門家生一男兒，字曰彌勒。出家學道，成最正覺。廣為眾生，如是比丘，三會說法。得蒙度者，悉我遺法種福眾生。三會度我遺殘眾生，然後乃化同緣之徒。」

賢護等十六正士

- 《大方等大集經賢護分》：「爾時王舍大城有優婆塞，名曰賢護，為眾上首。亦與五百優婆塞俱，受持五戒，具足威儀。是大菩薩，久已住於阿耨多羅三藐三菩提行。本願力故，常隨世尊。樂聞正法，恒懃精進。」
- 《佛光大辭典》：「密教用以表圓滿無盡之數。華嚴以十數為滿數，真言密教則以十六攝無盡無量。：：：顯經所說之十六菩薩、十六居士等，亦以十六之數總攝一切。」

二、明安立義（依「淨土門」）

普賢菩薩

- 《普賢行願品》：「又復是人，臨命終時，最後剎那：一切諸根悉皆散壞，一切親屬悉皆捨離，一切威勢悉皆退失，輔相大臣，宮城內外，象馬車乘，珍寶伏藏，如是一切無復相隨。唯此願王，不相捨離。於一切時，引導其前。一剎那中，即得往生極樂世界。」
- 《普賢行願品》：「願我臨欲命終時 盡除一切諸障礙 面見彼佛阿彌陀 即得往生安樂剎 我既往生彼國已 現前成就此大願 一切圓滿盡無餘 利樂一切眾生界」

妙德菩薩

- 《文殊師利發願經》：「願我命終時 除滅諸障礙 面見阿彌陀 往生安樂國 生彼佛國已 成滿諸大願 阿彌陀如來 現前授我記 嚴淨普賢行 滿足文殊願 盡未來際劫 究竟菩薩行」

菩 薩 名	表 法 身 功 德	表 念 佛 法 門 之 勝
普賢菩薩	諸佛所證法界	表示念佛法門乃是「他力門，果地教」故居首。
文殊菩薩	諸佛能證般若	表示念佛法門唯依智慧，方能承擔。

慈氏菩薩


- 《大寶積經》：「彌勒！我付囑汝：當來末世，後五百歲，正法滅時，汝當守護佛法僧寶，莫令斷絕。」
- 《佛說大乘無量壽莊嚴經》：「佛言慈氏：佛世難值，正法難聞，如來所行亦應隨行。於此經典作大守護，為諸有情長夜利益。莫令眾生墮在五趣莊嚴獄中，令諸有情種修福善，求生淨刹。」
- 《普賢行願品》：「往生極樂世界。到已即見阿彌陀佛，文殊師利菩薩，普賢菩薩，觀自在菩薩，彌勒菩薩等。此諸菩薩，色相端嚴，功德具足，所共圍遶。」

賢護菩薩


- 《釋淨土群疑論》：「般舟三昧經說：跋陀和菩薩請釋迦牟尼佛言：未來眾生，云何得見十方諸佛？佛教令念阿彌陀佛，即見十方一切諸佛。以此佛特與娑婆眾生有緣，先於此佛專心稱念。三昧易成，除障滅罪，光明遍照，見十方佛也。」

◎ 附表五：「讚歎菩薩功德」大綱


生起次第：




經文次第：




(一)、依菩薩法修自分行：



(二)、依佛法修勝進行：





(三)、總結：



◎ 附表六：第十七願大綱

立願緣由



願文大綱

(I) 解—諸佛不悉 — 咨 嗟 } 我名者

(II) 解—諸佛不悉咨嗟 (凡) 稱我名者

名號功德不可思議故——

《阿彌陀經要解》——「『阿彌陀』正翻『無量』，本不可說。本師以光、壽二義收盡一切無量。『光』，則橫十方；『壽』，則豎窮三際。橫豎交徹，即法界體。舉此體作彌陀身土，亦舉此體作彌陀名號，是故『彌陀名號』，即眾生本覺理性。『持名』即始覺合本，始本不二、生佛不二。故『一念相應一念佛，念念相應念念佛』也！」

隨順十方諸佛所行故——


《往生論》——「云何讚歎？口業讚歎。稱彼如來名，如彼如來光明智相，如彼名義，欲如實修行相應故。」

◎附表七： 釋「至心信樂」義

信：《唯識》——「於三寶之實、德、能， 深忍樂欲。」

(一) 至心：

大綱：



標示

經云：一者至誠心。至者真，誠者實。

詳明

簡擇

辨相

欲明一切眾生，身口意業，所修解行，必須真實心中作。不得外現賢善精進之相，內懷虛假。貪瞋邪偽，奸詐百端，惡性難侵，事同蛇蝎。雖起三業，名為雜毒之善，亦名虛假之行，不名真實之業也。

無益

若作如此安心起行者，縱使苦勵身心，日夜十二時急走急作，如炙頭燃者，眾名雜毒之善。欲迴此雜毒之行，求生彼佛淨土者，此必不可也。何以故？正由彼阿彌陀佛因中行菩薩行時，

有害 乃至一念一剎那，三業所修，皆是真實心中作。凡所施為趣求，亦皆真實。

正釋 **總標** 又真實有二種：一者自利真實，二者利他真實。

別明斷惡 言自利真實者，復有二種：一者真實心中，制捨自他諸惡及穢國等。行住坐臥，想同一切菩薩制捨諸惡，我亦如是也。

修善 二者真實心中，勤修自他凡聖等善：真實心中，口業
(口業) 讚歎彼阿彌陀佛，及依正二報。又真實心中，口業毀厭三界六道等，自他依正二報，苦惡之事。亦讚歎一切眾生三業所為善。若非善業者，敬而遠之，亦不隨喜也。


(身業) 又真實心中，身業合掌禮敬，四事等供養彼阿彌陀佛，及依正二報。又真實心中，身業輕慢厭捨，此生死三界等，自他依正二報。

(意業) 又真實心中，意業思想，觀察憶念彼阿彌陀佛，及依正二報，如現目前。又真實心中，意業輕賤厭捨，此生死三界等，自他依正二報。

結示 不善三業，必須真實心中捨。又若起善三業者，必須真實心中作。不簡內外明闇，皆須真實，故名至誠心。

(二) 信樂：

大綱：



就人立信^三

詳明^四

標示

二者深心。言深心者，即是深信之心也。亦有二種：

所信之法

一者，決定深信，自身現是罪惡生死凡夫，曠劫已來，常沒常流轉，無有出離之緣。

二者，決定深信，彼阿彌陀佛四十八願攝受眾生，無疑無慮。乘彼願力，定得往生。

又決定深信，釋迦佛說此觀經，三福九品，定散二善，證讚彼佛依正二報，使人欣慕。

又決定深信，彌陀經中，十方恒沙諸佛，證勸一切凡夫，決定得生。

生起之量

又深信者。仰願一切行者等，一心唯信佛語，不顧身命，決定依行。佛遣捨者即捨，佛遣行者即行，佛遣去處即去。是名隨順佛教，隨順佛意，是名隨順佛願，是名真佛弟子。

深信之益

又一切行者，但能依此經深信行者，必不誤眾生也！何以故？佛是滿足大悲人故，實語故。除佛已還，智行未滿，在其學地，由有正習二障未除，果願未圓。此等凡聖，縱使測量諸佛教意，未能決了。雖有平章，要須請佛證為定也。若稱佛意，即印可言，如是如是；若不可佛意者，即言汝等所說是義不如是。不印者，即同無記無利無益之語；佛印可者，即隨順佛之正教。若佛所有言說，即是正教、正義、正行、正解、正業、正智。若多若少眾，不問菩薩人天等，定其是非也。若佛所說，即是了教；菩薩等說，盡名不了教也，應知！

結示勸修

是故今時，仰勸一切有緣往生人等，唯可深信佛語，專注奉行。不可信用菩薩等不相應教，以為疑礙。抱惑自迷，廢失往生之大益也！此名就人立信也。

料簡

(文繁不引)

就_二行立信_一

正_二明正行_一

標章

次就行立信者。然行有二種：一者正行，二者雜行。

正明五行

言正行者，專依往生經行行者，是名正行。何者是也？

一心專讀誦此觀經，彌陀經，無量壽經等。

一心專注思想，觀察憶念，彼國二報莊嚴。

若禮，即一心專禮彼佛。

若口稱，即一心專稱彼佛。

若讚歎供養，即一心專讚歎供養，是名為正。

又就此正中，復有二種：一者，一心專念彌陀名號。

簡擇正助

行住坐臥，不問時節久近，念念不捨者，是名正定之業，

順彼佛願故。

若依禮誦等，即名為助業。

除此正助二行，已外自餘諸善，悉名雜行。

雜行

若修前正助二行，心常親近，憶念不斷，名為無間也。

總結

若行後雜行，即心常間斷，雖可迴向得生，眾名疏雜之

行也，故名深心。

◎附表八：《佛說無量壽經》攝修大綱

若善男子善女人，修五念門成就者，畢竟得生安樂國土，見彼阿彌陀佛。

何等五念門？一者禮拜門、二者讚歎門、三者作願門、四者觀察門、五者回向門。

云何禮拜？身業禮拜阿彌陀如來、應、正遍知，為生彼國意故。

云何讚歎？口業讚歎，稱彼如來名。如彼如來光明智相，如彼名義，欲如實修行相應故。

云何作願？心常作願，一心專念，畢竟往生安樂國土，欲如實修行奢摩他故。

云何觀察？智慧觀察，正念觀彼，欲如實修行毘婆舍那故。

彼觀察有三種：何等三種？一者觀察彼佛國土功德莊嚴，二者觀察阿彌陀佛功德莊嚴，三者觀察彼諸菩薩功德莊嚴。

云何回向？不舍一切苦惱眾生，心常作願，回向為首，成就大悲心故。

又向說佛國土功德莊嚴成就、佛功德莊嚴成就、菩薩功德成就，此三種成就願心莊嚴，應知。

略說入一法句故。一法句者，謂清淨句。清淨句者，謂真實智慧無為法身故。

如是菩薩奢摩他、毘婆舍那廣略修行，成就柔軟心。如實知廣略諸法，如是成就巧方便回向。

何者菩薩巧方便回向？菩薩巧方便回向者，謂說禮拜等五種修行，所集一切功德善根，不求自身住持之樂，欲拔一切眾生苦故。作願攝取一切眾生，共同生彼安樂佛國，是名菩薩巧方便回向成就。

